

四庫全書

經部

欽定四庫全書

經部

讀春秋編卷十二

詳校官鴻臚寺少卿臣梁景陽

給事中臣溫常綬覆勘

覆校官中書臣田尹衡

校對官中書臣金光悌

謄錄監生臣王頌修

欽定四庫全書

讀春秋編卷十

宋 陳深 撰

昭公

名裊襄公之子齊歸所生在位二十五年在外八年凡三十二年諡法威儀恭明曰昭

元年

庚申

春王正月公即位

春秋十二年公繼未踰年之君者三皆同正君閔之繼般宣

之繼赤昭之繼野是已閔以八歲立內無所承雖繼故而與聞乎弑故不書以志其哀宣之立雖與桓不同然其母私事公子遂遂託之以奪嫡宣公寧不知之故書即位以與聞乎故而如其意昭公之繼子野非故也正也繼正即位正也胡氏曰子野有命立昭公故穆叔雖不欲而不能止也

叔孫豹會晉趙武楚公子圍齊國弱

公羊弱作酌

宋向戌衛

齊惡

公羊作石惡

陳公子招蔡公孫歸生鄭罕虎

公羊作軒虎

許

人曹人于號

公羊作郭穀梁作郭宋之盟也宋盟在襄二十七年

左氏傳會于號尋

請用牲讀舊書宋之盟書加于牲上而已晉人許之三

月甲辰盟

宋之盟楚爭先晉讓之今號之會楚公子

圍以晉楚迭霸更主夏盟恐晉先之於是請讀舊書加

于牲上而不復軟故經不書盟蓋楚圍用計而欲爭勝

也夷狄之專盟其端見矣經於此二後皆先趙武抑強

夷而進中國也劉氏曰此陳侯之弟招也何不稱弟諸

侯之尊弟兄不得以屬通也胡氏曰公子者其本當稱也曰弟者因事而特稱之也

三月取鄆

左氏傳季武子伐莒取鄆莒人告于會楚告于晉曰尋盟未退謂弭兵之盟而魯伐莒潰

齊盟請戮其使時叔孫在會故請戮之樂桓子樂王鮒

相趙文子欲求貨於叔孫而為之請使請帶馬指言求

貨以請帶為辭弗與梁其蹊曰貨以藩身子何愛焉叔孫曰諸侯之會衛社稷也我以貨免魯必受師是禍之也何衛之為雖怨季孫伐莒累已魯國何罪叔出季處叔出使已守國有自來矣吾又誰怨然鮒也賄弗與不已召使者裂裳帛而與之曰帶其褊矣裂帛示不相逆趙孟聞之乃請諸楚曰魯雖有罪其執事不避難畏威而敬命矣子若免之以勸左右可也封疆之削何國蔑有主齊盟者誰能辨焉莒魯爭鄆為日久矣苟無大害於社稷可無亢也固請諸楚楚人許之乃免叔孫言伐莒而經不書為內諱也言取乘莒亂而得之易也晉楚會諸侯以弭兵而盟季武乃乘莒之隙以兵取鄆志貪利而不顧信義幾陷叔孫以為國羞晉雖未肯遽戮而豹亦殆矣矧昭公即位之始內外未聞德音而首取隣邑以自封殖豈交隣國之道乎

夏秦伯之弟鍼出奔晉

左氏傳秦后子即鍼也桓公子景公母弟有寵於桓如二君於

景如兩君於景公之世其母曰弗去懼選選數也恐景公數其罪而加戮癸卯鍼適晉其車千乘書曰秦伯之弟鍼出奔晉罪秦伯也后子之奔由其父寵之太過雖曰愛之其實害之經不書公予而曰秦伯之弟見秦伯不能友愛而使之出奔也罪在所奔者則以常文書之如公子慶出奔莒是也

六月丁巳邾子華卒

悼公卒莊公立

晉荀吳帥師敗狄于大鹵

大鹵公穀作大原大原晉陽縣穀梁曰中國曰大原狄人

曰大鹵

左氏傳晉中行穆子即荀吳

敗無終山戎及羣狄于大原崇卒也聚卒而戰也將戰魏舒曰彼徒我

車所遇

又阮本又作臨

以什共車更增十人必克困諸阮又克去車故克請皆卒自我始乃毀車以為行為步

陳五乘為三伍乘車者車三人五乘十五人今去車更以五人為伍分為三伍荀吳之嬖人不肯即卒斬以徇

為五陳以相離制步卒為五陳互相救援蓋以道阨難
於用衆制為五陳不相聯屬易於進退兩於前兩一也
伍於後伍二也專為右角專三也參為左角參四也偏
為前拒偏五也以誘之狄人笑之未陳而薄之大敗之
狄為中國患久矣傳文之際連年入寇自成二年晉
厲公敗之交剛迄悼公伯狄師不出至是而敗狄再見
然晉伯之衰止此矣魏絳曰勞師於我而楚伐陳必弗
能救是棄陳也諸華必叛戎禽獸也獲戎失華毋乃不
可乎及悼公卒未幾復有伐楚之師至
昭十二年經書晉伐鮮虞則外之矣

秋莒去疾自齊入于莒

莒展與出奔吳

莒子二子長去疾次展與

莒子遇弒去疾奔齊展與立奪羣公子秩公子名去疾

於齊秋齊公子鉏納去疾齊雖納去疾莒人先名之故

經從國逆例書入

展與奔吳展與吳外孫去疾假齊之

力以入莒討展與之罪正也故以國氏不稱公子者以

以其無所稟命自以為公子可立也展與踰年之君也
不書莒子國人不與之亦不君之也然猶以國氏惡崇
也亂

叔弓帥師疆鄆田

春取鄆今又乘莒之變恃其
徒衆往正疆界以亂為利也

葬邾悼公

冬十有一月己酉楚子麇卒

麇公穀作卷 左氏傳冬
楚公子圍將聘于鄭伍舉

為介未出竟聞王有疾而還伍舉遂聘十一月己酉公
子圍至入問王疾繼而弑之遂殺其二子幕及平夏葬
王于郊謂之郊教使赴于鄭伍舉問應為後之辭馬對
曰寡大夫圍伍舉更之曰共王之子圍為長 楚公子
圍弑其君麇而立乃以疾赴諸侯經不破其偽何耶是
時晉伯衰而楚最強中國諸侯力所不能討故聖筆包

顯微之義因之而不革也楚使使如晉求致諸侯復請
昏晉皆許之於是大會十二國于申雖內外混淆而中
國之列侯居過半矣向戌子產之良咸獻會禮焉遂用
齊桓會召陵之禮中國愈弱諸侯皆從于楚矣聖師感
世變之若此倘革而正之恐天下後世以楚麋之弑而
伯主不問諸侯不討反從之以主盟會則其弑君等土
苴耳故因其偽赴而不正
其弑逆之臯為中國諱也

楚公子比出奔晉

左氏傳公子圍弑楚子右尹子干即
公子比出奔晉宮廐尹子皙出奔鄭

即黑肱也蘇氏曰
君弑畏偏而出

二年

辛酉

春晉侯使韓起來聘

左氏傳晉侯使韓宣子來
聘且告為政而來見起代

趙武為政而來見魯禮也觀書于大史氏見易象與魯
春秋曰周禮盡在魯矣曰吾乃今知周公之德與周之

所以王也

夏叔弓如晉

左氏傳報宣子也

秋鄭殺其大夫公孫黑

案傳駟黑伐良霄而逐之君弗誅也又與游楚爭娶于徐吾氏

徐吾氏歸楚黑怒欲殺之楚知之逐之以戈傷君放楚于吳而盟諸大夫黑於是自以為卿又將作亂欲去游氏疾作而不果子產使吏數之曰爾有亂心無厭專伐伯有而臯一也兄弟爭室而臯二也薰隧之盟女矯君位而臯三也不速死大刑將至七月壬寅縊尸諸周氏之衢加木焉稱國以殺大夫罪累上也惡鄭伯不討有臯以放乎亂也黑富而怙強鄭人畏之故日肆其惡子產因其疾也數其臯而殺之然亦幸而勝之耳

冬公如晉至河乃復

季孫宿如晉

左氏傳晉少姜卒公如晉及河晉侯

使士文伯來辭曰非伉儷也請君無辱公還季孫宿遂致服焉致少姜之禭服公之如晉非禮也非禮而往至於見拒然後歸孰若始遣季孫宿行哉公如晉至河乃復者六唯二十三年書有疾明有疾而反餘皆識公數如晉見拒不能以禮自重取困辱也

三年

壬戌

春王正月丁未滕子原

公羊作泉卒

成公卒悼公寧立

夏叔弓如滕

五月葬滕成公

滕小國使叔弓會葬甚矣

秋小邾子來朝

左氏傳小邾穆公來朝季武子欲卑之穆叔曰不可曹滕二邾實不忘我好敬

以逆之猶懼其貳又卑一睦焉逆羣好也其如舊而加敬焉季孫從之

八月大雩

左氏傳早也

大雩凡三說見桓五年

冬大雨雹

北燕伯款出奔齊

左氏傳燕簡公多嬖寵欲去諸大夫而立其寵人冬燕大夫比相親比以

殺公之外嬖公懼奔齊書曰北燕伯款出奔齊罪之也以自奔書者以其不能君而為臣所脅而出也不書

臣之所逐不以臣而逐君也

四年癸亥春王正月大雨雹

自冬甫春大雨雹者二陰陽乖戾之氣也左氏載申豐之

對歸咎於不藏冰天人之理未必在于此豐季氏之黨佞人也不肯端言其故蓋陰侵陽不入則為雹是時春已三陽陰猶盛而干陽其應為三家專政無君之兆故洵有此災異昭公曾不知懼而思其政之闕失宜乎出亡在外也

夏楚子蔡侯陳侯鄭伯許男徐子滕子頓子胡子沈子

小邾子宋世子佐淮夷會于申

胡汝陰縣西北有胡城淮夷淮浦之夷也申姜

姓國南陽宛縣諸侯自夷儀之會晉受齊賂不討崔杼以成齊亂而晉失其政矣宋之盟則政在大夫晉楚始同主夏盟自此諸侯不出者幾十年中國無伯矣楚公子圍弑郟敖自立使于晉求合諸侯晉許之於是諸侯大會于申而楚主之不殊會淮夷楚固同類在會之諸侯靡然從之天下幾何不折而入楚乎周自東遷天子受制於諸侯魯文以來諸侯受制於大夫此年申之會中國受制於蠻荆尚有魯衛曹邾不至厥後晉君少安不在諸侯而政日以衰故楚得以逞其欲而無忌憚矣經書楚子於諸侯之上正以病中國之無人也

楚人執徐子

左氏傳

徐子吳出也以爲貳焉故執諸申楚子以疑罪執諸侯故書人以譏之

秋七月楚子蔡侯陳侯許男頓子胡子沈子淮夷伐吳

執齊慶封殺之

左氏傳秋七月楚子以諸侯伐吳宋太子鄭伯先歸宋華費遂鄭大夫從從楚

伐吳使屈申圍朱方吳邑齊慶封所封申屈蕩之子八月甲申克之執齊慶封而盡滅其族將戮慶封椒舉曰臣聞無瑕者可以戮人慶封唯逆命是以此其肯從於戮乎播於諸侯馬用之王弗聽負之斧鉞以徇於諸侯曰無或如齊慶封弑其君弱其孤以盟其大夫慶封曰無或如楚共王之庶子圍弑其君兄之子麋而代之

以盟諸侯王使速殺之穀梁傳慶封其齊氏何也為齊討也慶封弑其君而不以弑君之罪罪之者慶封不為靈王服也不與楚討也春秋之義用貴治賤用賢治不肖不以亂治亂也孔子曰懷惡而討雖死不服不曰

楚子會諸侯伐吳不與楚人主中國也執徐子楚意也不以諸侯共執為文而曰楚人執徐子所以甚楚子也

吳之伐執齊慶封者亦楚意也不曰楚執之而以諸侯共執為文不與楚子之討慶封也楚非為齊誅故不繫以討賊之辭也

遂滅賴

賴公穀作厲賴國今蔡州襄信縣有賴亭左氏傳遂以諸侯滅賴遷賴于鄢楚子欲遷許

于賴使鬬韋龜及公子棄疾城之而還穀梁曰遂繼事也許氏曰惡其因義而為利以惡終也既伐吳執齊慶封殺之今又滅賴楚人之暴甚矣

九月取鄢

左氏傳取鄢言易也襄六年莒人滅鄢此言取鄢者蓋莒滅鄢以為附庸今魯乘莒亂

爾取之

冬十有二月乙卯叔孫豹卒

案傳初穆子辟僑如之難成十六年及庚宗魯地遇

婦人使私為食而宿焉適齊娶于國氏生孟丙仲壬夢
天壓已弗勝顧而見人黑而上僂深目而顴喙號之曰
牛助予乃勝之及兄宣伯奔齊魯召穆子歸裏二年庚
宗婦人獻以雉問其姓女生曰姓謂子也曰余子長矣
召而見之則所夢也號之曰牛使為豎小臣也有寵長
使為政公孫明與叔孫相知於齊歸未逆國姜公孫明
取之故怒其子長而後使迎之田於邱猶遇疾豎牛欲
亂其室讒殺孟逐仲疾急召仲牛許而不召豹饑渴牛
不與食十二月癸丑叔孫不食乙卯卒牛立昭子豹庶
子嫪而相之五年仲至豎牛攻殺之昭子曰豎牛禍叔
孫氏殺嫡立庶必速殺之豎牛懼奔齊孟仲之子殺諸
塞闕之外報父仇也穆子才智士也少避難偶非其
類遂有孽子以符所夢故寵之卒為讒殺二嫡其身亦
餒而死蓋由犯禮不慎其始卒迷于愛以致大禍叔孫
不徵於理而徵於夢果可恃乎昭子不以豎牛立已
為勞亟發其罪遄遇其報天也昭子之識見亦遠矣

五年甲子春王正月舍中軍

魯本二軍襄十一年作三軍三分公室各有其一季氏盡

征之叔孫臣其子弟孟氏取其半及其舍之四分公室季氏擇二二子各一皆盡征之以貢于公皆季氏之私意卑公室也經書作書舍志其罪也詳見襄十一年

楚殺其大夫屈申

楚仇吳而疑屈申貳於吳也而殺之故稱國以殺大夫罪累上也

公如晉

左氏傳公如晉自郊勞至于贈賄無失禮晉侯謂女音汝叔齊曰魯侯不亦善於禮乎對曰是

儀也不可謂禮禮所以守其國行其政令無失其民者也今政令在家大夫家不能取也有子家羈莊公玄孫懿伯也其人賢弗能用也奸大國之盟陵虐小國取鄆利人之難取鄆不知其私公室四分民食於他他謂三家思莫在公不圖其終為國君難將及身不恤其所不憂其所底止禮之本末將於此乎在而屑屑焉習儀以

亟言善於禮不亦遠乎公二年嘗如晉為晉所辭至河而復今又復往公之卑弱見侮而不知恥可知矣

夏莒牟夷以牟婁及防茲來奔

左氏傳莒牟夷以牟婁及防

與茲莒三邑牟夷非卿而書尊地也竊地之罪重故不得不錄其人杜氏注城陽平昌縣西南有防亭姑幕縣

東北有茲亭地譜密州安邱縣有平昌故城莒縣有姑幕故城魯之於莒鄰國也元年取鄆六年取鄆今又

受牟夷以牟婁防茲三邑來奔貪利而不顧義甚矣不五年而取其五邑欲盡其地矣經屢書之以惡內也時

公如晉未返而輒受莒叛人三邑惡季氏之專也胡氏曰經於三叛人襄十一年邦庶其五年莒牟夷二十一

年邦黑肱雖賤特書其名以懲不義懼淫人為後戒也

秋七月公至自晉

左氏傳莒人愬于晉晉侯欲止公范獻子范鞅曰不可人朝而執之誘也

討不以師而誘以成之情也為盟主而犯此二者無乃不可乎請歸之間而以師討焉問音開乃歸公七月公

至自晉

戊辰叔弓帥師敗莒師于蚡

音粉泉

左氏傳莒人來討不設備戊辰叔弓敗諸

蚡泉莒未陣也蚡泉杜氏注魯地魯東境之地張氏曰晉人方欲止公以魯受年夷敗莒人大夫之專不顧霸討君辱比書而臯大夫之專可見矣

秦伯卒

左氏傳秦后子復歸于秦秦景公卒故也秦鍼奔晉至是歸秦景公卒哀公立

冬楚子蔡侯陳侯許男頓子沈子徐人越人伐吳

左氏傳四

年冬吳伐楚入棘櫟麻楚三邑以報朱方之役五年冬楚子以諸侯及東夷伐吳以報棘櫟麻之役吳早設備

楚無功而還越始見經姒姓夏后少康之庶子封於越其先也越國會稽山陰縣經於楚不遽進之越初見即書人以其為中國患淺與楚暴不同也

六年

乙丑

春王正月杞伯益姑卒

杞文公卒平公立

葬秦景公

夏季孫宿如晉

左氏傳拜莒田也

葬杞文公

宋華合比出奔衛

左氏傳宋寺人柳有寵大子佐惡之華合比曰

我殺之柳聞之乃坎用牲埋書而告公曰合比將納亡人之族既盟于北郭矣使視之有焉遂逐華合比合比奔衛襄陵許氏曰經書宋公殺其世子痤宋華合比出奔衛皆著寺人讒惡敗國以為世戒而秦漢以來庸君衰季溺心嬖習遠去忠良亂亡相屬若出一軌春秋惡可一日而不開明哉

秋九月大雩

也

楚遠罷帥師伐吳

左氏傳徐儀楚聘于楚楚子執之逃歸懼

其叛也

使遠

池伐徐吳人救之

令尹子蕩子蕩即遠罷

帥師伐吳

師于豫章

而次于乾谿

乾谿在燕國城父縣

南楚東竟

吳人敗其師

于房鍾

吳地獲宮廐尹棄疾棄

疾闕章龜之

父非公子棄疾也

子蕩歸罪於遠

池而殺

之襄陵

許氏曰

敗楚師者非遠池也

而池伏其誅故書

遠罷伐吳

以正之

楚再不競於吳

乃弭兵鋒有事陳蔡

至復伐徐

而國亂矣

吳蓋

自是休兵

息民

國始寢強

冬叔弓如楚

襄陵許氏曰四年公不會申既而震楚兵威將朝楚而未能故以叔弓先聘明年而

躬繼

之也

齊侯伐北燕

左氏傳齊侯如晉請伐北燕晉侯許之十月齊侯遂伐北燕將納簡公即北燕伯

三年出奔齊今將納之晏子曰不入燕有君矣民不貳
吾君賄左右諂諛作大事不以信未嘗可也七年正月
癸巳齊侯次于號燕竟燕人行成曰敝邑知罪敢不聽
命先君之敝器請以謝罪公孫皙曰受服而退俟釁而
動可也二月戊午盟于濡上燕人歸燕
姬賂以瑤璽玉櫝竿耳玉爵不克而還

七年

丙寅

春王正月暨齊平

穀梁傳

平者成也暨者不得已也以外及內曰暨爾雅曰

暨及也孫氏曰齊來求平不得已而許之故曰暨且明
非魯志也齊強魯弱以魯婚吳附楚也故來求平

三月公如楚

左氏傳楚子成章華之臺願與諸侯落之
大宰遠啓疆來召公三月公如楚魯昭

本欲如楚雖無遠啓疆之名亦往
也去夏而從楚經特書以貶之也

叔孫婁如齊蒞盟

穀梁曰蒞位也內之前定之辭曰蒞
外之前定之辭曰來始齊欲我平

魯不得已而與之平今乃使媾往蒞盟我所欲也彼既求平而又往盟是反畏之也

夏四月甲辰朔日有食之

秋八月戊辰衛侯惡卒

襄公卒孔成子立靈公元穀梁傳鄉曰衛齊惡在元年今日衛

侯惡此何為君臣同名也君子不奪人名不奪人親之所名重其所來也王父名子也蓋言人之子不敢與世子同名有生在世子前王父名之者則亦不改也親之所名臣雖欲改君不當聽欲使人重父命也父受名于王父王父沒則稱王父命名之

九月公至自楚

公如楚凡六月而返書至幸之也

冬十有一月癸未季孫宿卒

襄陵許氏曰季武子相魯作三軍舍中軍唯己所利

取鄆潰盟敗諸侯約幾陷名卿以為國憂則知昭公乾侯之禍其事欲不忘之習非一日也

十二月癸亥葬衛襄公

八年

丁卯

春陳侯之弟招殺陳世子偃師夏四月辛丑陳

侯溺卒

左氏傳陳哀公元妃鄭姬生悼大子偃師二妃生公子留下妃生公子勝二妃嬖留有寵屬諸

司徒招與公子過哀公有廢疾三月甲申公子招公子過殺大子偃師而立公子留夏四月辛亥哀公縊不

曰公子招而曰陳侯之弟招親之者所以甚招之惡也哀公昏迷溺愛而以公子留屬其弟招與過而輔之哀

公首禍固可罪也招以叔父之親不思宗社之重而達

君之惡殞冢嗣以立庶孽及其禍作哀公亦憂恚自殺

以致楚滅陳而縣

之招之罪大矣

叔弓如晉

左氏傳晉侯築虎音斯祁之宮在絳西四十里臨汾水虎祁地名叔弓如晉賀虎祁也游

吉

即子太叔

相鄭伯以如晉亦賀虎祁也史趙見子太

叔

曰甚哉其相蒙也蒙欺也可弔也而又賀之當楚

之強暴專盟橫行中夏晉侯於此時宜與二三忠良深

慮遠圖思所以制之之道方且侈汰自安唯宮室是崇

是可弔不可賀也吁

晉文之霸政衰矣

楚人執陳行人干徵師殺之陳公子留出奔鄭

左氏傳

赴于楚且告有立君告立留公子勝愬之于楚楚人執

而殺之公子留奔鄭書曰楚人執陳行人干徵師殺之

罪不在行人也楚人惡公子招而殺干徵師非其罪

也古者兵交使在其間可也楚將討陳故留出奔留既

為君何以稱公子留

留立於招未成君也

秋蒐于紅

杜氏注魯地沛國蕭縣西有紅亭遠疑劉氏傳蒐春事也秋興之非正也蒐有常地矣于

紅亦非正也然則曷為不言公公不得與於蒐爾曷為不得與於蒐三家者專魯而分之政令出焉公民食焉爾

陳人殺其大夫公子過

公子招歸罪於過而殺之以說於楚過與殺偃師經以招首事

書招而不及過今雖招殺過然過與殺偃師之罪重招殺過之罪輕不與招之殺過也故以陳人自討為文招所以不死而得效

大雩 冬十月壬午楚師滅陳執陳公子招放之于越

殺陳孔奭

左氏傳九月楚公子棄疾帥師奉孫吳偃師之子圍陳宋戴惡會之十一月壬午滅陳

招殺世子之賊也楚子執而放之陳孔奐無臯之人也
楚子殺之楚靈暴虐無道滅人之國而淫刑以逞不仁
之甚也經直
書之惡楚也

葬陳哀公

穀梁傳不與楚滅閔之也泰山孫氏曰十月
壬午楚師滅陳葬陳哀公如不滅之辭者楚

子葬之也不言楚子葬之者不與楚子滅陳
葬哀公故以陳人自葬為文所以存陳也

九年

戊辰

春叔弓會楚子于陳

左氏傳叔弓宋華亥鄭游
吉衛趙厲會楚子于陳楚

子在陳故四國大夫往不行會禮故不摠書

楚滅陳

諸夏之大夫震懼不召而至皆旅見于楚於是始舉魯
以見其餘也
是年楚滅
陳以穿封戌為縣公

許遷于夷

左氏傳二月庚申楚公子棄疾遷許于夷實
城父此時改城父為夷故傳實之城父縣屬

燕郡許畏鄭欲遷
故經以自遷為文

夏四月陳災

楚滅陳已縣之矣及災經猶書陳災公羊

未亡故也仍書陳災者中國無滅於夷狄
之道也書滅以罪夷狄書陳災以存中國

秋仲孫矍如齊

左氏傳孟僖子如齊殷聘盛聘以結好
禮也自叔老聘齊至今二十年今復

修盛聘得繼好
息民之禮也

冬築郎囿

築苑囿於郎也昭公為強臣所制不思危辱
將至方且築囿於郎郎非國內乃遠地也徒

知從事游觀之
樂豈急務乎

十年己春王正月齊樂施來奔

齊樂施高彊嗜酒信內
多怨彊於鮑氏而惡之

陳鮑及其醉而攻之樂高戰不勝來奔不書高彊非卿也齊政歸陳氏久矣樂高陳鮑之伉也樂施高彊阮奔則陳氏由此益大也

秋七月季孫意如叔弓仲孫貜帥師伐莒

左氏傳平子即意如伐莒

取鄭音梗莒邑獻俘始用人于亳社亳社殷社魯有殷社所謂兩社是也至是魯始以人祭殷社臧武仲在齊

聞之曰周公其不饗魯祭乎杜氏注取鄭不書公見討平邱故諱之十三年平邱之盟不見公公不與盟又執

季孫意如以莒告魯伐之故也胡氏曰已舍中軍曷為

猶以三卿並將乎季氏毀中軍四分公室擇其二二家

各有其一至是季孫身為主將二子各率一軍為之副則三軍固在其曰舍之者特欲中分魯國之衆為己私

耳

戊子晉侯彪卒

左氏傳晉平公卒鄭伯如晉及河晉人辭之游吉遂如晉

九月叔孫婼如晉葬晉平公

左氏傳九月叔孫婼齊國弱宋華定衛北宮喜鄭罕

虎許人曹人莒人邾人滕人薛人杞人小邾人如晉葬平公也

十有二月甲子宋公成卒

左氏傳宋平公卒元公立杜氏注無冬闕文公羊成作戊

十有一年

庚午

春王二月叔弓如宋葬宋平公

夏四月丁巳楚子虔誘蔡侯般殺之于申楚公子棄疾

帥師圍蔡

左氏傳楚子在申召蔡靈侯靈侯將往蔡大夫曰王貪而無信唯蔡於憾同今幣重而

言甘誘我也不如無往蔡侯不可三月丙申楚子伏甲而饗蔡侯于申醉而執之夏四月丁巳殺之刑其士七

十人公于棄疾帥師圍蔡韓宣子問於叔向曰楚其克乎對曰克哉蔡侯獲罪於其君而不能其民天將假手于楚以斃之何故不克然肸聞之不信以幸不可再也楚王奉孫吳以討於陳曰將定而國陳人聽命而遂縣之今又誘蔡而殺其君以圍其國雖幸而克必受其咎弗能久矣蔡殷殺君父而立其罪固不容誅諸侯不能討十三年矣楚子誘而殺之遂滅其國執世子以歸用之其心本非除逆特利其土地以詐取之而肆其虐耳故經惡楚子而名之不與其為討也

五月甲申夫人歸氏薨

昭公母胡女歸姓

大蒐于比蒲

昭公方有母喪而不廢蒐況大蒐非諸侯所當行是越禮之中又越禮也夫喪不貳

事果有外侮闕於社稷則不得已而行之今之蒐可已而不已昭公在疚曾無一日之戚其心喪矣宜乎被出

而卒不返矣比蒲地
謂是魯南鄙之地

仲孫貜會邾子盟于祲祥

左氏傳孟僖子即貜會邾子盟于祲祥盟會以安社稷故

喪盟謂之禮杜

氏注祲祥地闕

秋季孫意如會晉韓起齊國弱宋華亥衛北宮佗鄭罕

虎曹人杞人于厥慙

魚靳切地闕 晉韓起率諸侯會于厥慙謀救蔡也經不書救蔡以

其畏楚而不能救也楚自會申之後滅陳圍蔡愈肆其暴晉為盟主恬不之恤惟荀吳以為不恤亡國將焉用之茲役既合天下之兵而不能救徒遣使請命于楚而楚弗許是示之不能而楚益驕且有以量中國之力而得以行其虐也然書此無貶者聖人感世變若此故略之而不復以禮義望諸侯矣此後間一貶之而又不忍

終棄之也

九月己亥葬我小君齊歸

齊歸昭公之母齊謚也左氏傳葬齊歸公不感叔向曰

魯公室其卑乎君有大喪國不廢菟有三年之喪無一日之感國不恤喪不忌君也君無感容不顧親也能無卑乎殆其失國

冬十有一月丁酉楚師滅蔡執蔡世子有

穀梁作友以歸用

之

左氏傳楚子滅蔡用隱大子于岡山杜氏曰用之殺以祭山楚子而曰楚師惡而貶之也惡其用衆而不

與其滅也君沒未葬或已葬嗣君稱子今蔡侯死於楚其喪未至況當危難窮迫雖立不成乎君故但稱世子楚自四月圍蔡世子有守禦至于十一月凡八月而力屈被執楚以有不服故以其歸而虐用之有之效死勿

去為子道盡矣故不沒其世子之名春秋滅國者多矣未有如此暴者書誘書圍書滅書執又書其虐用之故特詳記又稱時稱月稱日以慎之蓋以傷中國之衰微而甚惡夷狄之殘忍不道也

十有二年

辛未

春齊高偃帥師納北燕伯于陽

三年燕伯款出奔齊

六年齊伐燕欲納之受燕賂不克至是始納之于唐高偃高傒玄孫齊大夫陽即唐燕別邑中山有唐縣左氏傳高偃納北燕伯款于唐因其衆也因唐衆欲納之故得先入唐而未得至于燕也燕伯三年出奔名之今納之不名與襄二十五年衛侯入于夷儀同蓋國君非臣下所當逐入于夷儀納于陽不名以正君臣之分也以燕之臯未至如衛朔衛衍鄭突諸侯失國諸侯納之正也凡諸侯之奔有書名者有不書者書名者罪失守也不書者皆被兵出奔恕其力不足也出入皆名者皆有惡也

三月壬申鄭伯嘉卒

鄭簡公卒
定公立

夏宋公使華定來聘

左氏傳通嗣君也
宋元公新即位

公如晉至河而復

左氏傳齊侯衛侯鄭伯如晉朝嗣君也
晉昭公新立鄭之役六年公伐莒

取鄭莒人愬于晉晉有平公之喪
未之治也故辭公公子慙遂如晉

五月葬鄭簡公

杜氏曰三月而葬速

楚殺其大夫成熊

熊公羊作然穀梁作虎
子謂成虎若敖之餘也遂殺之成虎

令尹子玉之孫與鬬氏同出於若敖或譖成虎於楚子
成虎知之而不能行書曰楚殺其大夫成虎懷寵也

當貶楚子信讒殺其大夫不當貶成虎
不能行傳以名為貶未可以一槩論也

秋七月

冬十月公子慙出奔齊

左氏傳季平子即季孫意如立立七年

而不禮於南蒯蒯南適之子季氏費邑宰南蒯謂子仲即公子慙吾出季氏而歸其室於公子更其位子謂慙我以費為公臣子仲許之叔仲小南蒯公子慙謀季氏慙告公而遂從公如晉南蒯懼不克以費叛如齊子仲還及衛聞亂逃介介副使而先及郊聞費叛遂奔齊南蒯為季氏不禮謀去季氏而立公子慙不克而事變慙不得不奔其志則忠於魯也杜氏以謀亂故書名謬矣

楚子伐徐

左氏傳楚子狩于州來次于潁尾使蕩侯潘子司馬督嚳尹午陵尹喜五大夫帥師圍徐

以懼吳徐吳與國圍之以懼吳楚子次于乾谿在譙國城父縣南以為之援

晉伐鮮虞

鮮虞白狄別種也在中山新市縣古鮮虞國子姓左氏傳六月晉荀吳偽會齊師者假

道於鮮虞遂入昔陽昔陽肥國都秋八月壬午滅肥以
肥子緄皐歸冬伐鮮虞因肥之役也經書晉伐外之也
惇信明義君子之道也懷利尚詐小人之道也晉假道
鮮虞聲言會齊乃滅肥又伐鮮虞是行小人之事故外
之昔獻公假道於虞以滅虢書晉師其執虞公也書晉
人今伐鮮虞特書晉以外之時楚滅陳蔡而晉不救以
其力不能故不復罪之能伐鮮虞不救陳蔡非力不足
也絕意中夏而棄諸侯也何以言盟主故春秋外之以
著其罪也

十有三年

壬申

春叔弓帥師圍費

費魯邑南蒯為季氏宰此邑以邑叛故叔弓以

兵圍之凡家臣以邑叛悉不書叛但書大夫圍之則邑
叛可知且罪大夫無政而使家臣得專邑而叛也克之
不書本非他國之邑也胡氏曰季孫意如以所惡於下
者事上而不忠其君以所惡於上者使下而不禮其臣

出乎爾者反乎爾宜南蒯之及此也蒯之叛雖以季氏不禮之故而其所以欲去季氏以強公室則未為不忠於魯故難以叛書之但書使大夫帥師圍費亦見季氏雖強而家臣不服也

夏四月楚公子比自晉歸于楚弑其君虔于乾谿

乾谿在譙

國城父縣東竟楚子審共王有子五人曰昭曰虔曰比曰黑肱曰棄疾雷卒昭立昭卒昭之子麇立虔弑之而自立比出奔晉黑肱奔鄭楚虔立十三年棄疾為蔡公觀起之子從在蔡矯蔡公命名公子比與黑肱入襲蔡奉蔡公蔓成然蔡朝吳帥陳蔡不葬音即許葉之師因四族之徒蓬氏許圍蔡涌蔓成然羣失職者以入楚因正僕人太子近官殺太子祿及公子罷敵公子比為王公子黑肱為令尹次于魚陂公子棄疾為司馬使觀從師于乾谿而遂告之楚子虔駭縊于芊尹申亥氏比之歸非其謀也亂始於觀從而成於棄疾以比為

名而已為君非比志也比不志為君迫於觀從棄疾而
以身許之以致虔死則雖不弑君而弑君之名比尸之
矣比之歸虔猶在楚不曰入何也觀從召之蔡人與
之楚人不拒則比之歸無難也棄疾為蔡公志於墓
久矣而觀從召比之至乘諸失職者之亂既已致虔之
死又殺其子大惡則比當之矣比既無能無德而棄疾
安肯使之坐享其位故譎計以恐之使之自殺則棄疾
之志得矣其謀亦巧乎哉故春秋於比不以討賊辭書
者殺之不以罪也故以兩下相殺之辭書之比雖立而
曰公子比亦不以為君也然比兄也黑肱弟也棄疾其
季弟也立比為王肱為令尹棄疾為司馬以長幼
之序立之也春秋誅其意歸罪棄疾而無所隱也

楚公子棄疾殺公子比

公子比鄙懦人耳初觀從召之
也非有為君之心從挾之入楚

立之為王從又說之殺棄疾不從乃行其行也從未必
不反為棄疾謀及棄疾使人徧呼國中逼之自殺視比

之行止死生皆聽人自為略無所能則棄疾安肯君之哉比雖立而不能君其國故經不稱君但以公子書之又不足以討賊書原棄疾之意在於伐比而非討之也

秋公會劉子晉侯齊侯宋公衛侯鄭伯曹伯莒子邾子

滕子薛伯杞伯小邾子于平邱

平邱今在開封府封邱縣東漢志尚為平邱縣

左氏傳晉成虜音斯祁宮也諸侯朝而歸者皆有貳心為取鄭在十年鄭莒邑魯取之晉將以諸侯來討為

莒討魯叔向曰諸侯不可以不示威乃並徵會于吳秋

晉侯會吳子夷昧也于良下邳水道不可吳子辭乃還

七月丙寅治兵邾南甲車四千乘羊舌鮒叔向弟攝司

馬遂合諸侯于平邱晉之合諸侯止于此矣雖能張

中國之勢未足以服荆楚也王人與十三諸侯會兵車之盛固足以使強楚知畏陳蔡滅國一日俱復然徒耀

以兵威而不以德異乎桓文矣自平邱一盟之後訖于名陵諸侯不出者二十四年至若鄆陵一會參盟復作自齊威以來未之有於是再見自是晉不復主盟而齊專盟矣晉之霸業自是而不復振也

八月甲戌同盟于平邱

書同盟者以齊人不欲盟要之乃可鄭伯滕子邾子又皆從楚

非一日今一旦會盟不得不疑是以必為之同盟冀其自此無復有異矣再書平邱者胡氏曰惡之也惡其德不競而矜兵公不與盟此會以邾莒愬魯取鄆故意欲甲脅持之也

公不與盟

此會以邾莒愬魯取鄆故意欲討魯今將因會而執季孫意如

故怒而不使與盟雖一時似有沮喪之辱而此盟不與得免於罪實為幸也此非國惡故聖筆不諱而書之

晉人執季孫意如以歸

晉執意如亦伯討也何以書人曰季氏專魯無君意如尤甚信

可臯晉不能以大義廢之使三家臣順徒信邾莒以魯數侵不能共晉貢而遂執之安得為霸討故稱人以臯

也晉

公至自會

蔡侯廬歸于蔡陳侯吳歸于陳

蔡周宗室陳虞舜後

楚靈彊暴一旦滅之伯主不討諸侯不救楚平立乃復之諸侯若不聞焉則是二國之命制于夷狄也聖筆以陳蔡自歸為文所以折強夷而存中國也

冬十月葬蔡靈公

國復乃葬凡三十一月穀梁傳變之不葬有三失德不葬弑君不葬滅國

不葬然且葬之不與楚滅也陳蔡之復聖人舉王法以治蓋陳蔡者先王之建國非楚可滅而可復也故書爵歸言二國之嗣位其所固有國其所宜歸也

公如晉至河乃復

左氏傳公如晉荀吳謂韓宣子曰諸侯相朝講舊好也執其卿而朝其君

有不好焉不如辭之乃使士景伯辭公于河公不與
平邱盟又以季孫意如在晉故再如之晉人辭焉至河
乃復晉疆而魯弱甚矣

吳滅州來

左氏傳吳滅州來楚令尹子期請伐吳王弗許曰吾未撫人民未事鬼神未脩守備未定

國家而用民力敗不可悔州來在吳猶在楚也子姑待
之州來楚邑也不言吳帥師不言侵伐于以見其滅
之易

十有四年

癸酉春意如至自晉

大夫不至見執而後至亦危之也不稱氏前見也以

一事再見卒名耳意如被執子服惠伯滋也從意如
之歸以子服私說荀吳之謀以利動之也晉之政可知
矣

三月曹伯滕卒

武公卒子平公須立

夏四月

夏四月凡十一詳見桓九年

秋葬曹武公

八月莒子去疾卒

冬莒殺其公子意恢

左氏傳莒著音除邱公卒郊公著邱子不感國人弗順欲立著邱之

弟庚輿

共公蒲餘侯莒大夫茲大也惡公子意恢而善

於庚輿公子鐸因蒲餘侯而與之謀曰爾殺意恢我出

君而納庚輿許之冬十二月蒲餘侯茲夫殺莒公子意

恢郊公奔齊公子鐸迎庚輿於齊襄陵許氏曰公子

鐸首亂而無見焉者春秋書法表見王道而已不誅其

人若鐸類者多矣此意自韓愈發之韓愈詩曰春秋書

王法不誅其人身

十有五年

甲戌春王正月吳子夷末

公羊作夷昧

卒

王僚立

二月癸酉有事于武宮

魯武公廟

籥入叔弓卒去樂卒事

左氏

傳禘

合祭

于武宮叔弓蒞事籥入而卒去樂卒事禮也

籥羽舞也

方入而大臣卒故去樂而終禘祭之事春

秋常事不書此記禮之變而書之也

夏蔡朝吳出奔鄭

朝吳蔡臣也楚平以其忠於舊君而信之費無極楚之讒人也惡朝吳之

寵以計害之使蔡人逐朝吳出奔鄭楚平不察無極讒慝卒使吳師入郢辱及宗廟可不畏哉聖筆志朝吳出奔為後世戒之也

六月丁巳朔日有食之

秋晉荀吳帥師伐鮮虞

左氏傳晉

荀吳伐鮮虞圍鼓

白狄之別克之以鼓子戴鞮歸帥師伐鮮虞凡三

冬公如晉

左氏傳平邱之會故也平邱會公不與盟季孫見執今既得免故往謝之公不與

平邱為恥而往如之屢見辭於晉今又復往微弱甚矣

十有六年

乙亥春齊侯伐徐

左氏傳齊侯伐徐二月丙申齊師至于蒲隧徐地也下邳徐

人行成徐子及鄭人莒人會齊侯于蒲隧賂以甲父之鼎甲父古國名叔孫昭子曰諸侯之無伯害哉為小國

害齊君之無道也興師而伐遠方會之有成而還莫之亢也無伯也夫襄陵許氏曰景公之時吳楚方爭晉既不能遠略以齊之強務德修政以通天下之志糾合諸侯復霸可也區區務乎伐徐伐莒之利志亦卑矣

楚子誘戎蠻子殺之

蠻公羊作曼杜氏注河南新城縣有蠻城今伊闕縣新城也左氏

傳楚子聞蠻氏之亂也與蠻子之無質信也也使然丹誘戎蠻子嘉殺之遂取蠻氏既而復立其子焉蘇氏

曰楚子誘蔡侯殺之名而書地以其殘害中國疾之也誘殺我蠻不名不地其類相殘略之也我蠻不名告略也

夏公至自晉

左氏傳正月公在晉晉人止公不書諱之也公至自晉子服昭伯子服回也語季平

子曰晉之公室其將遂卑矣君幼弱六卿強而奢侈將因是以習習實為常能無卑乎魯昭朝晉三至于河而不得入兩得見晉侯又問其罪而止之昭之懦可知矣責其自強必不能也

秋八月己亥晉侯夷卒

昭公卒子頃公去疾立

九月大雩

早也

李孫意如如晉冬十月葬晉昭公

杜氏

注三月而葬速

十有七年

丙子

春小邾子來朝

左氏傳小邾穆公來朝朝魯也

夏六月甲戌朔日有食之

秋邾子來朝

八月晉荀吳帥師滅陸渾之戎

陸渾之戎密邇王室而雜處非肅畿輔別內外

之義也晉滅之舉荀吳名氏非褒辭也纔得無貶耳晉以其貳於楚故也

冬有星孛于大辰

公羊傳孛者何彗星也其言于大辰何在大辰也大辰者何大火也大火

心星大火為大辰伐為大辰北辰亦為大辰伐謂參伐大火與伐天所以示民時早晚北辰北極天之中也迷

東西者常視此以別心伐

何以書記異也

左氏傳有

星孛于大辰西及漢孛出辰西光芒東及天漢

申須魯

大夫曰彗所以除舊布新也天事恒象天道恒以象示人今除於火火出必布焉諸侯其有火災乎鄭裨竈言

於子產曰宋衛陳鄭將同日火若我用瑾箏玉璫鄭必
不火子產弗與胡氏傳大辰心也為明堂天子之象其
前星太子後星庶子孛星加心象天子適庶將分爭也
後五年景王崩王室亂劉子單子立王猛尹氏召伯立
子朝歷數載而後定至哀十三年有星孛于東方不言
宿名者不加于宿也當是時吳人僭亂憑陵上國日敝
於兵暴骨如莽其戾所感固將墮吳而降之罰也故氛
祲所指在于東方假手越人吳國遂滅天之示人顯矣
史之有占明矣許氏曰星孛大辰火災應之天地之符
也大辰明堂當宋之分故王室亂宋亦亂衛陳鄭災氣
所溢也衛亂君奔陳敗卿獲惟鄭有
令政而無後災是知禍福之可轉矣

楚人及吳戰于長岸

長岸楚地言戰不言敗勝負均也
春秋伐者為客見伐者為主吳伐

楚戰于長岸先書楚人主及客也 楚彊非吳之敵今
長岸之戰勝負適均由楚德不競故其彊易弱經特書

之于以見強之不足恃也

十有八年

丁丑

春王三月曹伯須卒

平公卒子悼公午立

夏五月壬午宋衛陳鄭災

左氏傳夏五月火始昏見丙子風梓慎曰魯大夫是謂融

風火之始也

融風木也木火母七日其火作乎戊寅風

甚壬午大甚宋衛陳鄭皆火公羊傳何以書記異也何

異爾異其同日而災也外異不書此何以書為天下記

異也前年有星孛于大辰裨竈豫言四國同日火今

已驗鄭子產臨事而備至于書焚室而寬其征與之材

三日哭國不市使行人告於諸侯宋衛皆如是陳不救

火許不弔災君子以是知陳許之先亡也裨竈雖言之

於先子產以天道遠亦不深信遂不聽竈以瓘筭禳火

但修德以

德消變耳

六月邾人入郕

音禹又音矩姁姓國在琅邪開陽縣今屬沂州臨沂縣邾人乘郕人藉稻蓋

履行之若今踏田也襲之遂入盡俘以歸邾反郕夫人而舍去聲其女不義甚矣故明年致宋之伐

秋葬曹平公冬許遷于白羽

白羽一名析楚邑今鄧州內鄉縣許自夷遷

葉今復畏逼於鄭楚人遷之白羽皆以自遷為文蓋許志也

十有九年

戊寅

春宋公伐邾

左氏傳邾夫人宋向戌之女故向寧戌之子請師二月宋

公伐邾圍蟲邾邑三月取之乃盡歸邾俘胡氏曰此所謂聲罪執言之師也故書伐邾而釋其取邑之罪此亦善善長惡惡短之義

夏五月許世子止弑其君買

左氏傳許悼公癘五月戊辰飲大子止之藥卒大子

奔晉書曰弑其君穀梁傳止不弑也不弑而曰弑責止也止曰我與夫弑者不立乎其位以與其弟也哭泣歔飭粥嗑不容粒未踰年而死故君子即止自責而責之也許悼公瘞世子止進藥公飲之遽卒夫疾瘞未足以致死飲其藥即死豈非藥之誤以致死乎觀左氏所記世子出奔與穀梁所載止悔恨之言則因藥誤而死無疑矣誤以藥殺亦猶弑也其心雖異乎商臣蔡般之所為而春秋一以弑書以臣子之於君父不可過也加之大惡所以遏篡弑之萌爾使後世凜然知懼以過誤致君父死猶被此惡名不少恕果有篡逆之惡安可逃其罪乎此聖筆垂訓之意也

已卯地震

石氏曰地震者陽伏而不能出陰迫而不能蒸也地震凡五詳見文九

秋齊高發帥師伐莒

左氏傳齊高發帥師伐莒莒子奔紀鄆莒邑使孫書伐之孫書陳無

字之子子占也初莒有婦人莒子殺其夫已為嫠婦及老託於紀鄆託身紀鄆之邑紡焉以度而去之因紡績連所紡以度城而藏之以待外攻者欲以報仇及師至則投諸外或獻諸子占子占使師夜緹以登登者六十人緹絕師鼓譟城上之人亦譟莒共公懼啓西門而出七月丙子齊師入紀

冬葬許悼公

賊不討何以書葬曰止非躬蹈乎大逆也其出奔哀毀自責可以見其心也公羊謂

經書世子弑其君買是君子之聽止也聽治其罪葬許悼公是君子之赦止也赦止者免止之罪辭也

二十年

已卯

春王正月

夏曹公孫會自鄆出奔宋

鄆莫公反又音夢今曹州乘氏縣古鄆城也言自鄆者大

夫有罪待放于境而後出奔也胡氏曰曹無大夫其曰公孫賢之也待放而賢之為公子喜時子臧也之後賢

之也喜時能以國讓以其賢者之後苟有善焉斯進之矣

秋盜殺衛侯之兄縶

盜衛司寇齊豹也縶有疾弟靈公受其國縶狎齊

豹奪其司寇與鄆邑又惡北宮喜褚司圉欲去之公子朝通于襄夫人宣姜懼討豹遂與此三人作亂殺縶齊豹非卿書盜者目罪人之賤者也不書衛公子而斥言衛侯之兄者累及衛侯也謂衛侯俾兄與政縱其無禮於大夫又不能制其母春秋貶靈公無政刑致盜賊竊發兄死幾亡其國故直書之以著其罪也

冬十月宋華亥向寧華定出奔陳

寧公羊作甯宋元公無信多私而惡華

向三大夫華亥誘羣公子殺之公如華氏請馮弗許遂劫之取太子為質公不忍其詢攻之華向奔陳華登奔吳華向誘殺羣公子又劫公其專恣悖逆甚矣公不忍而攻之一日而三卿出亡君臣之道喪矣宋之亂自

此而未已也

十有一月辛卯蔡侯廬卒

平公卒太子朱悼立弟東國賂楚費無極計以出朱故奔

楚而東國篡立

昭二十三年卒

二十有一年

庚辰

春王三月葬蔡平公

夏晉侯使士鞅來聘

晉頃公即位通嗣君也左氏傳晉士鞅即范獻子來聘叔孫即昭子

為政季孫

平子欲惡諸晉憎叔孫位在己上欲使得罪

於晉使有司

以齊鮑國歸費之禮為士鞅鮑文子歸費

在十四年為七年

士鞅怒曰鮑國之位下卿位卑下其

國小而使鞅從其牢禮是卑敝邑卑晉國也將復諸寡

君言歸告君討魯罪魯人恐加四牢焉為十一牢言魯

不能以禮事大國為哀七年吳敝百牢起本襄陵許氏

曰禮好不結而財求無度則聘義亡矣自是聘不復志

宋華亥向寧華定自陳入于宋南里以叛

公羊作畔宋司馬華費遂

之子貍及多僚相惡多僚譖貍于公公將逐之貍殺多僚劫費遂以叛而召亡人華亥等華向入華氏居廬門

以南里叛

南里宋城內里門

宋城舊鄘及桑林之門而

守之華向等與宋分國而居之召吳楚以自救齊師宋

師敗吳師遂敗華氏公子城以晉師至曹翰胡曹大夫

會晉荀吳齊苑何忌衛公子朝救宋與華氏戰于赭邱

大敗華氏楚遠越帥師逆華氏諸國大夫遂出之華亥

向寧華定華貍華登皇奄傷省臧士平出奔楚

華向

前年抗君背國結黨而出今年因華貍召之復入于宋

南里以叛為人臣而悖亂構禍若此所當誅滅而不赦

今入宋而戰敗宋師既圍之於內諸侯助之於外何患

賊乏不得已楚人釋君而臣是助諸侯之戍怠於救患

固請逸賊而宋又從之則皆罪也故諸國大夫救宋經皆不書聖人之意可見也想其時叛臣困守圍內至急必行賄於諸國大夫不然何減叛垂成而欲縱之也度諸大夫又慮楚援無功或致怒楚不肯盡力誅叛俾宋逸之失此之舉亂臣賊子無忌憚矣

秋七月壬午朔日有食之

左氏傳七月壬午朔日有食之公問於梓慎曰是何物也

禍福何為對曰二至二分日有食之不為災日月之行分同道也二分日夜等故言同道至相過也二至長短極故言相過其他月則為災陽不克也陰侵陽是陽不勝陰故常為水於是叔輒哭日食昭子叔孫婁曰子叔即輒將死非所哭也八月叔輒卒

八月乙亥叔輒卒

見上文

冬蔡侯朱出奔楚

左氏傳費無極取貨於東國朱之叔而謂蔡人曰朱不用命於楚君王將

立東國若不先從王欲楚必圍蔡蔡人懼出朱而立東國朱愬于楚楚嘗誘蔡侯般殺之又執世子有用之東國欲奪國賂楚權姦出朱而立朱奔訴于楚不克以權姦為之謀以阻之也然二子棄中國忘世讎其惡甚矣

公如晉至河乃復

左氏傳公如晉及河鼓叛晉晉克鼓在十五年鼓屬鮮虞晉將伐鮮虞故

辭公公如晉至河而復凡五詳見昭二年

二十有二年

辛巳

春齊侯

景

伐莒

左氏傳齊北郭啓齊大夫帥師伐莒莒子將戰

苑羊牧之諫曰齊師賤其求不多不如下之大國不可怒也弗聽敗齊師于壽餘莒地齊侯伐莒莒子行成司

馬竈如莒涖盟莒子如齊涖盟于稷門齊地門也之外
莒於是大惡其君為明年莒子來奔傳襄陵許氏曰齊
景矜忿貪欲不務反德而亟伐人國以
誅莒於稷門矜而自功惡能及遠哉

宋華亥向寧華定自宋南里出奔楚

左氏傳楚蓬越使
告于宋曰寡君聞

君有不令之臣為君憂寡君請受而戮之諸侯之戍謀
曰若華氏知困而致死楚恥無功而疾戰非吾利也不
如出之以為楚功其亦無能為也已乃固請出之宋人
從之已巳宋華亥向寧華定華貍華登皇奄傷省臧士
平出奔楚華向叛逆之罪不可勝誅宋師圍之必可
勦之也諸大夫畏楚之救請縱之俾楚有功亂人得以
逸宋洎諸國大
夫俱可罪也

大蒐于昌間

劉氏傳何以書譏何譏爾大蒐于昌間公
不與非禮也蓋不得與爾襄陵許氏曰八

年秋蒐十一年夏蒐以為書不時今此春蒐時矣而書則凡昭公書蒐主刺大夫咸強公失其政兵戎是務而禮防不興上下相與以樂愒憂也文王之時人倫既正而後軍旅以律朝廷既治而後田野即功是以詩歌庶類蕃殖蒐田以時常魯昭之季朝廷人倫逆亂極矣而惟蒐田之是務是以屢書以刺之

夏四月乙丑天王崩

左氏傳王子朝賓起有寵於景王子朝景王之長庶子賓起子朝之

傳王與賓孟

即起

說之欲立之劉獻公之庶子伯蚩事

單穆公

康公

劉摯

伯蚩

劉狄

穆公

單旗

惡賓孟

之為人

也願殺之又惡王子朝之言以為亂願去之子朝有欲位之言故劉蚩惡之

夏四月王田北山使公卿皆從將

殺單子劉子王知單劉不欲立子朝故欲因田獵先殺

之王有心疾乙丑崩于榮錡氏戊辰劉子摯卒無子單

子立劉蚩五月庚辰見王見王猛蓋太子壽之母弟遂

攻賓起殺之盟羣王子于單氏王子猛次正故劉單立

之懼諸王子或
黨子朝故盟之

六月叔鞅如京師葬景王

叔鞅叔弓子三月而葬亂故速石氏曰魯使會天王之葬

者二叔孫得臣葬襄王與此叔鞅葬景王是也魯公不親往而使大夫非正也

王室亂

王室亂景王為之也景王太子壽早卒次立王猛又寵愛孽子子朝而欲立之不克而崩劉子

單子奉子猛為王而子朝結黨作亂書王室亂者言亂自內作猶若一家之亂也

昔襄王子帶之亂與此同何

為不書曰成晉文之功也一定襄王而亂不復作也今子朝之亂而特書傷晉文不復見而無以治之也

先書王室亂何

以書後事也

劉子單子以王猛居于皇

劉單奉子猛為王而子朝作亂故出居于皇以避之猛未

踰年稱王成猛之為王以猛為宜立也出而言居如成君也其言劉子單子以王猛者子朝亂猛位未定進退在二子也二子卿子爵皇周地河南鞏縣有黃亭未踰年不可稱天王稱王繫名乃王者在喪之常稱也

秋劉子單子以王猛入于王城

王城郊廓今河南洛陽也即所謂成周也不言

成周而言王城以未得國也再書以王者見劉單挾天子專國柄也其言入于朝難之也

冬十月王子猛卒

左氏傳十一月乙酉王子猛卒乙酉在十一月經書十月誤雖未即位周

人謚曰悼王不成喪也釋所以不書王崩已丑敬王即位猛母弟王子句館于子旅氏周大夫不崩不葬降成

君也言猛所以別羣王子也時十月官籍諱荀躒以九州之戎即陸渾及四邑之師納王十二月晉籍諱荀躒

賈辛司馬督帥師軍于陰等處閏月晉其遺樂微右行說取前城及園郊其始皆內懷觀望無救難之實也

王室之亂若此天下卒無諸侯之助匹夫之救故雖有晉之師累至而春秋皆不書之也

十有二月癸酉朔日有食之

二十有三年

壬午

春王正月叔孫婼如晉

案傳邾人城翼還自離姑邾邑

武城人塞其前道徑魯之武城絕之也邾師過乃推而廢之

斷其後之木而弗殊弗絕之也邾師過乃推而廢之推斷木而廢仆於地以絕

邾師走路遂取邾師言易也

獲徐鉏邱弱茅地邾人愬于晉晉人來討叔孫婼如晉謝取邾師之罪傳言晉人

來討何其愬之急而討之速而經不見蓋魯取邾師度邾必愬于晉故令叔孫往聘以抒其事

癸丑叔鞅卒

晉人執我行人叔孫婼

書晉人貶晉執使人取邾師非

使人之罪言執我行人甚晉之罪也魯取邾師邾愬于晉晉為盟主當問魯之罪可也今執其行人豈其罪耶

故書晉以人貶之也晉雖執叔孫問罪卒不能屈而歸之安能使邾之心服而魯之知懼也晉伯於是乎衰矣

晉人圍郊

左氏傳正月壬寅朔二師圍郊王師晉師也郊子朝邑癸卯郊潁潁二邑子朝所據丁未

晉師在平陰今河陰縣王師在澤邑周地王使告閒子朝敗故敬王使人告閒暇於晉庚戌還呂氏曰當時

王必以為無假晉師故使之閒晉師歸而子朝之勢復熾若因郊之潰遂取子朝不如後日之難也胡氏曰

既不書大夫之名氏又不稱師而曰晉人微之也所謂以其事而微之也張氏曰既不書晉師之納王又不書郊潰而特書晉人圍郊則晉之勤王不力縱賊不誅以貽後患之罪具見矣

夏六月蔡侯東國卒于楚

東國假楚以計篡國今朝楚而卒于楚屈已事讎不二年

身死于外亦可誅也

東國卒昭侯申立

秋七月莒子庚輿來奔

左氏傳庚輿虐而好劍苟鑄劍必試諸人國人患之又將叛齊

烏存莒大夫率國人逐之烏存執爰道左庚輿過之遂出奔幸而免耳齊人立郊公為君而不仁幾何而不亡其國庚輿入國不書書出奔惡之也郊公出入皆不書微之也

戊辰吳敗頓胡沈蔡陳許之師于雞父

音甫楚地安豐縣

胡子

鬬沈子逞滅獲陳夏齧

左氏傳吳人伐州來楚邑楚薳越帥師及諸侯之師奔命救州

來吳人禦諸鍾離

子瑕卒楚令尹楚師燾音共火滅為燾言軍中無氣勢吳公子光曰諸侯從於楚者衆而皆

小國也畏楚而不獲已是以來吾聞之曰作事威克其愛雖小必濟胡沈之君幼而狂陳大夫薳壯而頑頓與許蔡疾楚政楚令尹死其師燾帥賤多寵政令不壹七國同役而不同心帥賤而不能整無大威命楚可敗也

若分師先以犯胡沈與陳必先奔三國敗諸侯之師乃
搖心矣諸侯乖亂楚必大奔請先者去備薄威示之以
不整以誘之後者敦陳整旅敦厚也吳子從之戊辰晦
戰于雞父吳以罪人三千先犯胡沈與陳囚徒不習戰
以示不整三國爭之吳為三軍以繫於後中軍從王光
帥右掩餘吳壽夢子帥左吳之罪人或奔或止三國亂
吳師擊之三國敗獲沈胡之君及陳大夫舍胡沈之囚使
奔許與蔡頓曰吾君死矣師譟而從之吳師三國奔楚
師大奔書其敗不以國分而以君大夫為序書其死
不以事同而以君臣為別皆取以辨上下定民志書
胡沈以自滅為文皆以其自取滅亡深惡之也不書
楚者吳知楚令尹亡將卑而六國心不一以誦計又以
晦日忌戰出其不意不待成列先誘三國戰三國敗而
獲其君諸侯奔而楚師亦奔故不書也傳初言遠越
帥師及諸侯之師救州來則楚師同在此也楚雖不喪
師而大奔亦敗也不然遠越何肯自撙而不歸也經特

以楚未嘗與吳
戰故不書楚

天王居于狄泉尹氏立王子朝

天王王猛之母弟敬王
句也既葬踰年臣子可

以天王稱之矣經直書之所以明天下之居也居狄泉
以避子朝也狄泉今洛陽城內太倉西南池水也時在
城外居此言未得京師也尹氏尹文公圍周世卿也不
書爵不書名字曰尹氏譏世卿也書尹氏立王子朝猶
曰尹氏所欲立也將欲王天下而尹氏以世卿擅國獨
欲立之則莫之與矣經既書天王居于狄泉繼云尹氏
立王子朝纂辭也其
惡不待貶而自見矣

八月乙未地震

地震凡五詳
見文公九年

冬公如晉至河有疾乃復

公七如晉一見止四見拒而
不得入今書有疾乃復公羊

氏所謂殺恥也因有疾以殺畏晉之和公累如晉而累有見卻之辱曾不知愧微弱之甚豈能自立哉宜乎見制權臣而卒于外也

二十有四年

癸未

春王二月丙戌仲孫矪

俱縛切

卒

孟僖子也

婁至自晉

公羊作叔孫舍胡氏從之執婁而釋之以歸故書其至

晉

夏五月乙未朔日有食之秋八月大雩

傳旱也

丁酉杞伯郁釐卒

公羊作鬱釐

冬吳滅巢

左氏傳楚子為舟師以略吳疆行吳疆界將使之沈尹戌曰此行也楚必亡邑不撫民而

勞之吳不動而速之吳踵楚而疆場無備邑能無亡乎王及圍陽而還吳人踵楚而邊人不備遂滅巢及鍾離

而還沈尹戌曰亡郢之始於此在矣王壹動而亡二姓之帥亡守巢鍾離二大夫幾如是而不及郢胡氏曰巢

楚附庸實邑之也書吳入州來著陵楚之漸書吳入巢著入郢之漸四隣封境之守既不能制則封境震矣四境國都之守既不能保則國都危矣故沈尹戌以此為亡郢之始也

葬杞平公

二十有五年甲申春叔孫婁如宋

夏叔詣會晉趙鞅宋樂大心衛北宮喜鄭游吉曹人邾

人滕人薛人小邾人于黃父

案左氏傳鄭子太叔見晉范獻子獻子曰若王室何

對曰王室之不寧晉之恥也獻子懼而與宣子圖之乃徵會於諸侯期以明年二十五年會于黃父謀王室也

王室之亂今四載矣晉為方伯帥諸侯勤王平難特反掌耳乃命大夫出師圍郊之後不出者又二年王于朝之黨日熾敬王出居狄泉有東王西王之分二十四年三月方使士景伯問周始絕于朝之使及六月鄭子太叔至晉有言方議明年徵會黃父又皆使大夫往養亂至數年而後定京洛交戰喋血敬王出入靡定晉侯曾不以王室為憂愧乎厥祖文公矣果以大夫而定王國政在大夫權移于下實啓將來之禍未艾也黃父即黑壤

晉地

有鸛鵒來巢

公羊鸛作鵒左氏傳有鸛鵒來巢書所無也師已魯大夫曰童謠有之鸛之鵒之

公出辱之鸛鵒之羽公在外野云云公羊傳記異也何異爾非中國之禽也宜穴又巢也何氏曰宜穴又巢推

臣自下居上之微也其後卒為季氏所逐范氏曰鸛鵒不渡濟非中國之禽故曰來飛之類屬陽得氣之先

鷓鴣不踰濟今至魯其徵見矣書有以非所當有書來巢非所當巢物失其性而反其常異之大也季氏以臣抗君昭公出外是其應也

秋七月上辛大雩季辛又雩

左氏傳再雩旱甚也魯旱甚不聞省躬修政而從

事禱祠之末一月而再雩瀆神者數烏能消變也

九月己亥公孫于齊次于陽州

魯昭孱弱不能自立久矣一旦不忍一朝之忿

謀於羣小欲去強悍之季氏何不思之甚也季氏擅權凡四世矣得衆之久豈易圖之昔宣公末年歸父欲張公室而未能豈區區稠父所能去之哉宜乎見逐于外也書孫于齊不言奔諱之也次止也次于陽州待齊命也陽州齊魯境上地

齊侯唁公子于野井

左氏傳齊侯將唁公子于平陰平陰齊地左濟北今東平府平陰縣公先至

于野井濟南府禹城縣東野井亭齊侯曰寡人之罪也使有司待于平陰為近故也杜氏注齊侯唁公公不敢

遠勞故逆之往至野井唁慰安之也生事曰唁死事曰

弔昭公不量力欲攻季氏不克為季氏迫脅而出往齊

求援欲假齊之力伐季氏齊侯遠唁禮與辭雖足觀特末耳而卒無為公討強臣復國之實意豈非陰與季氏

乎經書唁公實貶齊侯也

冬十月戊辰叔孫婁卒

叔孫昭子魯之良大夫也昭公孫于齊昭子自闕歸見季孫謀

納公季孫許之而異志昭子憤其見欺祈死于宗戊辰卒杜氏曰恥為平子所欺因祈而自殺

十有一月己亥宋公佐卒于曲棘

左氏傳宋元公將為公故如晉己亥卒于

曲棘公羊傳曲棘者何宋之邑諸侯卒其封內不地此
何以地憂內也時宋公聞昭公見逐欲憂納之至曲棘

而卒故錄之杜氏注陳留外黃縣城中有曲棘里外黃
城在開封雍邱縣胡氏傳宋元季孫意如之外舅元公

夫人曹氏生女妻意如不此之顧而欲納公是以正倫
恤患為心而不恤其私親者也其賢於當時諸侯遠矣
故卒于封內而特書其地以別之也

十有二月齊侯取鄆

鄆季氏邑魯之所有齊侯取以處
公也外取邑不書此何以書為公

取之也外取邑稱人齊獨稱侯者以齊有方伯討不登
畔人之意所以異之也惜乎齊侯不能以義討季氏使
公得復國而徒假之以力取邊邑以居之非正也故書
取焉取易辭也魯昭不能取而齊能取之以此見昭之
微弱不能自有其國而
他人是望可哀也已

二十有六年

乙酉

春王正月葬宋元公

杜氏注三月而葬速

三月公至自齊居于鄆

公孫于齊次于陽州陽州齊魯境上齊侯來見之亦可以言至

自齊也今居鄆則入魯境其書至宜也猶在外故書地見為季氏所拒而不得入國也凡公行反而告廟則書至在外雖不告而書至所以存公也胡氏謂書居于鄆者存一國之防也諸侯之於封國四境之內莫非其土非大夫所得專也齊侯遠唁昭公盡其辭禮而實有拒之之意取鄆以居之使之於魯境僅得有所處而其實陰與季氏使之得以恣其專齊侯無急義救患之心洞見矣經止書實事而義見於言外季氏之罪自可知也

夏公圍成

成孟氏邑也孟氏得民久矣公假齊師之力圍之者成不服而拒守也見國內知有季氏

而不知有
昭公也

秋公會齊侯莒子邾子杞伯盟于鄆陵

鄆音專又音團左氏傳謀納公

也此參盟也自齊桓以來未之有也於是再見其再見何晉不復主盟矣晉不復主盟而後齊專盟矣

公至自會居于鄆

公圍成而鄆陵之會至書居于鄆明不得成也率謀納公已而不果納公

復居于鄆

九月庚申楚子居卒

平王卒子昭王軫立

冬十月天王入于成周尹氏召伯毛伯以王子朝奔楚

案傳晉師克鞏召伯盈逐王子朝天王入于成周盈本黨于朝知其不成更逐之而逆敬王子朝及召氏之族

毛伯得尹氏固南宮騫奉周之典籍以奔楚定五年王人殺子朝于楚成周今在洛陽城東三十餘里故城即周公所營下都也王城今河南城武王定鼎于郊鄆至成王在豐使召伯先相宅卜澗水東澠水西而營洛邑是為王城子朝作亂居王城今雖奔楚尚有餘黨敬王畏之徙都成周經不言歸而言入以著即位于外也亂之萌也皆景王寵庶孽以構禍其危甚矣亂至數年而後定聖筆特書于魯史以垂世戒也

二十有七年

丙戌

春公如齊

自鄆行也

公至自齊居于鄆

左氏傳言

在外也公在外邑故書地

夏四月吳弑其君僚

左氏傳吳子欲因楚喪而伐之使公子掩餘公子燭庸帥師圍潛楚

邑使延州來季子聘于上國楚莠尹然工尹麋音君帥師救潛吳師不能退吳公子光曰此時也弗可失也告

鮪設諸曰我王嗣也吾欲求之夏四月光伏甲於堀室而享王鮪設諸寘劔於魚中以進抽劔刺王鉞交於胷遂弑王吳公子掩餘奔徐公子燭庸奔鍾吾皆僚母弟吳子壽夢四子長諸樊次餘祭次夷末次季札光諸樊之子僚夷末之子諸樊兄弟以次相及必欲致國季子而季子終不受則宜歸之光不當立僚也故春秋不書光弑僚而稱國以弑者罪當時秉政之大臣也大臣置君使內外物議厭服庶幾國本定而不搖若出於私意立非其正未必不貽禍將來也經之稱國以弑其旨微矣

楚殺其大夫卻宛

案傳稱卻宛直而和國人說之令尹子常賄而信讒宛為費無極所惡讒

之於子常設詭計陷之而宛不察甲兵豈宴享贈遺之物無極俾陳之以與子常無異戲兒童而宛特信之何蔽之甚也宜其蹈殺身之禍是時楚平昏虐囊瓦貪殘以無罪而殺楚之良俾讒譖得以肆其毒故稱國以殺

罪累

上也

秋晉士鞅宋樂祁犁衛北宮喜曹人邾人滕人會于扈

案傳會于扈令戍周且謀納公也宋樂祁犁衛北宮喜皆利納公固請之士鞅取貨於季孫拒之曰二子皆圖國者也而納魯君請從二子圍魯無成死之二子懼皆辭乃辭小國而以難復季孫逐君衆所疾惡范鞅貪而志賂反道季氏之善使少知義肯如是乎其人不足取也然經無貶辭以有戍周之善故序而不略也文十五年諸侯伐齊齊賂晉不克還經於是略而不序扈京兆府鄆縣扈鄉

冬十月曹伯午卒

悼公卒弟聲公野立

邾快來奔

快邾大夫不氏略之也邾之臣來奔者書之邾與魯隣國而聚其逋逃經悉書之以示譏

也

公如齊

自鄆行

公至自齊居于鄆

二十有八年

丁亥

春王三月葬曹悼公

六月而葬緩

公如晉次于乾侯

乾侯在魏郡晉境內邑公如晉求援次于乾侯以待命晉不答焉此明

年所以復居于鄆也公連年如齊而不見禮今又如晉而不得入其窮辱若此齊甥舅之國而晉又盟主皆與季氏而不見恤中國之伯政衰矣公至晉子家子諸次竟以待命而公弗聽晉人請復于境而後逆公已在外有一子家而不用其言則公之自任以取辱宜矣

夏四月丙戌鄭伯寧卒

定公卒獻公薨立

六月葬鄭定公

三月而葬速

秋七月癸巳滕子寧卒

悼公卒頃公結立

冬葬滕悼公

二十有九年

戊子

春公至自乾侯居于鄆

杜氏曰以乾侯至不得見晉侯

故前此公次于陽州而書公至自齊者齊侯見公也今言至自乾侯者晉侯不見公也所以深罪晉也

齊侯使高張來唁公

唁公不得入于晉也高張高偃子唁公稱主君大夫稱主君比魯公於

大夫子家子曰齊卑君矣君祇辱焉公如乾侯公為齊所卑故復適晉冀晉見恤

公如晉次于乾侯

再如晉亦不納公既無所往姑次于乾侯昭公至自齊居于鄆三至自

會居于鄆一至自乾侯居于鄆一書至書居所以存君也公播越于外不獲其所而魯國君臣之義其可絕乎下書公在乾侯亦此意也諸侯失國託於諸侯禮也諸侯失國諸侯納之正也晉坐視而不之救齊徒唁之而未嘗見恤亦何濟也

夏四月庚子叔詣卒 秋七月

冬十月鄆潰

潰散也民散而逃去也公居鄆四年無德以懷其民民畏季氏之威而不安嘗以公

而敗于且音道知矣今潰而叛去之公尺地一民無有也往于乾侯聊復寄耳書鄆潰如鄭棄其師梁亡是也

三十年

己丑

春王正月公在乾侯

經每歲首月書公在乾侯者存公也公居于鄆

猶魯地也客寄乾侯晉地也非其所矣必言公之所在不與季氏之專國也其罪權臣貶諸侯之意具見矣

二十九年春王正月公在楚以其留於夷狄為失其所故亦書其所在因以譏之也今之書在以公在外不敢遽無公也其於君父之義盡矣

夏六月庚辰晉侯去

上聲

疾卒

頃公卒定公午立

秋八月葬晉頃公

三月而葬速

冬十有二月吳滅徐徐子章羽奔楚

案傳吳子執鍾吾子遂伐徐己卯滅

徐徐子章羽斷其髮攜其夫人以逆吳子吳子唁而送之使其邇臣從之遂奔楚楚沈尹戌帥師救徐不及遂城夷使徐子處之常山劉氏曰齊滅譚譚子奔莒楚滅弦弦子奔黃狄滅溫溫子奔衛國滅君奔皆不名春秋之世強陵弱衆暴寡而滅人之國其君力有不勝而奔者於其國義未絕也訴於天子方伯則理可伸而邦可

復矣焉可遽絕之哉唯徐子章羽獨名者以既服吳而奔楚安有興復之志乎故名之以著其絕也

三十有一年

庚寅

春王正月公在乾侯

季孫意如會晉荀躒

音

于適厯

適音的晉地左氏傳晉侯將以師納公范獻子

曰若名季孫而不來則信不臣矣然後伐之若何晉侯名季孫獻子使私焉曰子必來我受其無咎季孫意如會晉荀躒于適厯荀躒曰寡君使躒謂吾子何故出君有君不事周有常刑子其圖之季孫練冠麻衣跣行伏而對曰事君臣之所得也敢逃刑命君言魯君若以臣為有罪請囚于費以待君之察也亦唯君若以先臣之故不絕季氏而賜之死若弗殺弗亡君之惠也死且不朽若得從君而歸則固臣之願也敢有異心扈之會晉欲納公范獻子受季孫之貨而還季孫必用意深結獻子今晉使荀躒來將以納公而獻子又私謂季孫

令必來季孫如會何晉不罪季孫反與之會皆季孫善於要結晉卿為之蒙蔽而不見其惡季孫包藏姦慝善於言辭繆為禮遜所謂象恭滔天者也晉定為下所蔽不能燭其姦其昏可知安能主夏盟矣

夏四月丁巳薛伯穀卒

襄二十五年薛與盟故書獻公卒子襄公定立

晉侯使荀躒唁公于乾侯

左氏傳季孫從知伯即荀躒如乾侯子家子曰君與之歸

一慙之不忍而終身慙乎公曰諾衆曰在一言矣君必逐之荀躒以晉侯之命唁公且曰寡君使躒以君命討於意如意如不敢逃死君其入也公曰君惠顧先君之好施及亡人將使歸冀除宗祧以事君則不能見夫人謂季孫已所能見夫人者有如河荀躒掩耳而走曰寡君其罪之恐言晉君恐不獲納君之罪敢與知魯國之難臣請復於寡君退而謂季孫君怒未怠子姑歸祭言且歸攝君事子家子曰君以一乘入于魯師季孫必與

君歸公欲從之衆從者脅公不得歸魯昭既出如齊如晉皆不見納徒使使來唁特虛禮耳昭之庸劣執蔽固不足道君也季氏以臣出君可乎齊晉不明君臣之義為季氏要結其卿以自固卒之寵姦成亂不知從自也及

秋葬薛獻公冬黑肱以濫來奔

杜氏注濫東海昌慮縣不書邾史闕文左

氏傳邾黑肱以濫來奔賤而書名重地也許氏曰邾快黑肱相繼來奔季孫當國以類至也

十有二月辛亥朔日有食之

三十有二年

辛卯

春王正月公在乾侯

取闕

口暫反杜氏注公居

乾侯遣人取之石氏曰非公意也如取鄆取鄆之比杜氏誤闕東平須昌縣有闕城魯羣公墓地今東平府

須城縣

東平鄆州

昭公之難叔孫自闕歸定

元年季孫使役如闕公氏將溝焉蓋魯地也

夏吳伐越

左氏傳始用師於越也史墨曰不及四十年

越其有吳乎越得歲而吳伐之必受其凶歲

歲星也此年歲在星紀星紀吳越之分也歲星所在其國有福吳先用兵故反受其殃哀二十二年越果滅吳

去此三十八歲

吳報越

昭五年從楚來伐之憾

秋七月 冬仲孫何忌會晉韓不信齊高張宋仲幾衛

世叔申鄭參曹人莒人杞人小邾人城成周

左氏傳秋

八月王使富辛與石張如晉請城成周范獻子謂魏獻子曰與其戍周不如城之雖有後事晉勿與知可也冬十一月晉魏舒韓不信如京師合諸侯之大夫于狄泉尋盟且令城成周己丑士彌年營成周計丈數計所當城

之丈數揣高卑度高曰揣度厚薄仞溝洫度深曰仞物
土方物相也相取土之方面議遠邇議役徒之遠邇量
事期知事幾時畢計徒庸知用幾人功慮財用知費幾
財用書餼糧知用幾糧食以令役於諸侯屬役賦丈賦
所當城丈尺書以授帥而更效諸劉子帥諸侯之大夫
效致也韓簡子臨之以為成命穀梁傳天子徵諸侯不
享觀天子之在者惟祭與號故諸侯之大夫相帥以成
之此變之正也孫氏曰城成周者不與大夫城京師也
天子徵諸侯又徵故諸侯不城京師而大夫城之是天
下無諸侯也故云諸侯之大夫城成周以惡之張氏田敬
王遷都成周因諸大夫城之而以成周書紀實也

十有二月己未公薨于乾侯

左氏傳書曰公薨于乾侯言失其所也不薨路寢為

失所魯自季友受費為上卿至于意如專執國命四世
矣昭公憤其太專攻之不克而出如齊如晉求援而不

見答晉雖欲納公不思逐季氏使公從晉而入亦仍制於季氏故昭公不肯入而卒客死于外而當世之於季氏則亦莫之罪也吁人心至此禮義絕滅惟知有勢利耳故經于公之出魯國政事皆不載但書公所在蓋聖筆誅權臣存大義也

讀春秋編卷十

欽定四庫全書

讀春秋編卷十一

宋 陳深 撰

定公

名宋襄公子昭公弟
諡法安民大慮曰定

元年

壬辰

春王

昭公於去年之十二月薨于外二子公衍
公為季氏惡之而廢嫡將立公之弟公子

宋至六月公之喪至五日而宋始即位宋非受之先君
受之于季氏自正月至六月魯國無君而正朔無所承
故經但書春王二字不書正月略之也所以抑強臣也

三月晉人執宋仲幾于京師

晉大夫韓不信城成周以
仲幾不受功擅執之而不

以天子之命又不以歸京師故經書
以疾之其專執無君之罪具見矣

夏六月癸亥公之喪至自乾侯戊辰公即位

昭公喪至而即位示

有所繼也當不崇朝即定又奚待六日乎蓋意如有所制也書之以著其惡也

秋七月癸巳葬我君昭公

昭公薨于乾侯暴露六月喪始至魯七月而後克葬季孫

猶欲溝其墓域而易其諡號以榮成伯之言而止季孫之惡著矣

九月大雩

書不時也詳見桓五年

立煬宮

煬音羊去聲立者不宜立也煬公伯禽子

也其廟已毀昭公之出季氏禱之昭公死外季氏以為獲福故立其宮書以譏之

冬十月隕霜殺菽

菽經歲而後成耐寒之物也十月初寒沍霜未嚴何以能殺菽也書此以

記異也

二年

癸巳

春王正月

夏五月壬辰雉門及兩觀災

天火曰災

言火自雉門延及兩觀也正義曰明堂位曰庫門天子臯門雉門天子應門是魯之雉門公宮南門之中門也釋宮曰觀謂之闕郭璞曰宮門雙闕周禮太宰正月之吉懸治象之法于象魏使萬民觀治象鄭衆曰象魏闕也劉熙釋名曰闕在門兩旁中央闕然為道也然則其上懸法象其狀巍巍然高大謂之象魏使人觀之謂之觀也兩觀與象魏闕一物而三名也石氏曰明堂稱魯之宮廟與天子之制同者曰庫門天子臯門雉門天子應門則雉門天子之制也傳稱天子兩觀外闕諸侯臺門則兩觀天子之禮也魯以周公之故僭天子之禮久矣春秋因其災以見之言過制以致天災也魯不敬天之戒而又新作之失禮甚矣大室屋壞御廩災成周宣榭火之類必更而新之經皆不書惟此雉門及兩觀書者惡內之不祗天變而以僭侈為所常也

秋楚人伐吳

吳子誘楚師至而敗之遂圍巢克之獲楚公子繁守巢大夫襄陵許氏曰自襄三年

書楚伐吳終於人之則楚力竭矣於是有吳入郢自昭三十一年書吳伐越終於越再入吳於是吳亡楚介在南荒夷蠻相攻不可單錄故刪取其要如此以為伐國之戒七書楚伐僅能一克于朱方他後皆敗無功書伐而不書敗者積其陵暴首兵之咎將微之於此而後至於禍敗失國也

冬十月新作雉門及兩觀

穀梁傳言新有故也作為也雉門兩觀天

子之制魯僭久矣既災而復作習舊而不知為非履變而不知為戒春秋因事以示貶也

三年

甲午

春王正月公如晉至河乃復

程子曰季孫意如上不請於天子下

不告於方伯而立定公故晉怒而公往朝焉晉辭公而復故明年因會而請盟于臯鼫由又切

二月辛未邾子穿卒

左氏傳邾莊公與夷射音亦又夜姑飲私出闌乞肉焉奪之杖而敲

去聲之三年邾子在門臺臨廷闌以餅水沃廷邾子望見之怒闌曰夷射姑旋焉命執之弗得滋怒自投于床廢于鑪炭爛遂卒莊公下急而好潔故及是莊公卒于隱公乞立

夏四月

秋葬邾莊公

六月乃葬緩

冬仲孫何忌及邾子盟于拔

左氏傳盟于郕修好也杜氏注郕即拔也郕淮陽軍

下郕縣東八十里有郕子城宣四年平莒與郕

四年

乙未

春王二月癸巳陳侯吳卒

惠公卒子懷公柳立

三月公會劉子晉侯宋公蔡侯衛侯陳子鄭伯許男曹

伯莒子邾子頓子胡子滕子薛伯杞伯小邾子齊國夏

于召陵侵楚

蔡侯如楚因不與于常裘佩止之三年後獻之得歸蔡病之如晉請伐楚晉請命于

周於是天子之卿大合諸侯會于召陵將以救蔡伐楚也而卒不能明暴其罪以行天討不振旅而還卒使吳乘其釁至冬蔡侯以吳子及楚人戰于柏舉楚師敗績召陵此舉合十八國之衆而不能有為但入楚之竟而已故經書侵楚陋之也當時晉雖主之實劉子為之以周之不競而能合諸侯之師盛於五伯未幾不幸而劉子卒君子蓋深悲之也

夏四月庚辰蔡公孫姓帥師滅沈以沈子嘉歸殺之

左氏

傳沈人不曾于召陵晉人使蔡伐之夏蔡滅沈沈役屬楚未始通晉則何以責其不會伐蔡以晉命恃強滅

沈以之歸而又殺之甚矣它日寧免公孫翩之禍乎書以歸罪沈于嘉不能死社稷故也

五月公及諸侯盟于臯鼬由又反程子曰公不獲見於晉故因會而求盟則此盟

公意也故書以及重言諸侯劉子不與盟也臯鼬杜氏注許地繁昌縣東南有城臯亭

杞伯成卒于會悼公卒傳公過立

六月葬陳惠公許遷于容城容城地闕或以為近晉

秋七月公至自會不致侵楚公以得盟為幸

劉卷卒杜氏注即劉蚩也劉子奉命出盟召陵死則天王為告同盟陸氏纂例畿內諸侯不同列國故

不言劉子卷卒亦譏來赴故書之王卿士不卒有關於天下之故則卒之

葬杞悼公 楚人圍蔡

左氏傳楚為沈故圍蔡

晉士鞅衛孔圉帥師伐鮮虞

昭十二年楚滅陳蔡晉人不救而伐鮮虞故經稱晉

以外之今晉會諸侯不為蔡伐楚蔡為楚圍而不之救而又伐鮮虞畏強凌弱也然經仍書晉士鞅衛孔圉何耶晉棄諸侯固可罪而蔡無滅國之禍輕重之異也士鞅即范鞅孔圉孔羈孫

葬劉文公

文謚也趙氏曰劉文公天子畿內諸侯列國不當與行交往之禮今會其葬非禮也

冬十有一月庚午蔡侯以吳子及楚人戰于柏舉

楚地

師敗績楚囊瓦出奔鄭

楚圍蔡蔡求救於晉晉荀寅求貨於蔡弗得而辭蔡侯遂折召

陵之謀蔡去晉求吳救吳許之冬十一月蔡以吳之師及楚戰楚師敗績囊瓦奔鄭吳稱子善救蔡也然經不

曰救者吳楚相攻非一日吳子胥宰嚭皆有謀楚復讎之志蔡人往請會逢其適吳遂假為蔡出師之名本非有救災恤隣之實故不言救囊瓦以貪殘敗國喪師又不能死故記其奔而稱人賤之也書蔡以吳子者言蔡能用吳而左右之也吳楚強弱雖不同不以夷主中夏也然自此之後吳日強遂主中國會盟矣

庚辰吳入郢

吳子救蔡伐楚春秋善之及囊瓦敗奔長驅入郢乘其國破君亡殺其父兄係其子

弟毀其宗廟遷其重器君舍于君之室臣舍于臣之室虐及生死不義之甚狄道也春秋惡之故不書爵而舉號反而狄之也

五年

丙申

春王三月辛亥朔日有食之

三公羊作正

夏歸粟于蔡

左氏傳夏歸粟于蔡以周亟急也矜無資杜氏注蔡為楚所圍饑乏故魯歸之粟

於越入吳

於發聲也從其本國之自稱也猶所謂句吳也左氏傳越入吳吳在楚也乘吳在楚而

入其國也

六月丙申季孫意如卒

左氏傳季平子行東野還未至丙申卒于房劉氏意林曰意

如之罪固著矣及其卒也絕之則其著也不亦彌信乎而春秋弗為也以謂定不書正月適足以見定之非正而猶未足以見其受國於季氏故於是復明意如之為定之大夫也

秋七月壬子叔孫不敢卒

冬晉士鞅帥師圍鮮虞

左氏傳三年秋鮮虞人敗晉師于平中晉地獲晉觀虎恃其勇

也五年晉士鞅圍鮮虞報觀虎之役也鮮虞白狄別種也前年秋晉士鞅與衛孔圉伐之今冬士鞅又帥師

圍之晉不能以德懷之徒數加以兵兵愈忿而愈不服經屢書之以惡晉也

六年

丁酉

春王正月癸亥鄭游速帥師滅許以許男斯歸

左氏傳鄭滅許因楚敗也許依楚楚師敗不暇救也許自隱十一年魯齊鄭入之後使許叔居許東偏成十五年遷于葉昭十八年又遷于白羽定四年又遷容城許逼鄭數為鄭所困故依楚而屢遷之近楚以圖存也六年楚為吳所敗鄭乘其敝使大夫遂滅之鄭以大夫滅諸侯而以其國君歸甚矣春秋之義以其君歸者皆名之以其失地不能死社稷之罪也

二月公侵鄭公至自侵鄭

左氏傳公侵鄭取匡為晉討鄭之伐晉靡也晉靡周地周

僖翩因鄭人以作亂為之伐晉靡晉使討之往不假道於衛及還陽虎使季孟自南門入出自東門陽虎將逐

三桓欲使得罪於隣國衛侯怒使彌子瑕追之公叔文子諫而止張氏曰奉晉命以討鄭黨亂人正也然陪臣方執國命使衛侯不聽公叔之言魯師危矣故至之

夏季孫斯仲孫何忌如晉

左氏傳季桓子如晉獻鄭俘也陽虎強使二子請已謂晉

人曰陽虎若不能居魯而息肩於晉所不以為中軍司馬者有如先君許氏曰魯國政在大夫而家臣能強使之則家臣始擅國矣劉氏意林曰陽虎陪臣也而執國命欲蕩公室以自封久矣事不成故竊寶玉大弓以逃春秋本其禍之所構自二子之使夫以二子之力專國擅君而陽貨能制之方復為之請於伯主之國此其無所忌必為亂之效也

秋晉人執宋行人樂祁犂

宋樂祁聘晉其冢宰陳寅知晉政多門往必有難使樂祁

立後而行趙簡子逆而飲之酒於繇上獻楊楮六十於簡子陳寅曰昔吾主范氏今子主趙氏又有納焉以楊楮賈禍弗可為也已范獻子果怒言於晉侯曰以君命越疆而使未致使而私飲酒不敬二君不可不討也乃執樂祁宋專使來聘晉敬盟主也而晉卿范獻子與趙簡子私忿以宋使有所獻於趙故譖而執行人經稱晉人以執貶之也非伯討也執無罪徒絕鄰國之好耳況又出於大夫私意晉侯之昏庸可知宜乎權移三家而伯統絕矣

冬城中城

杜氏注公為晉侵鄭故懼而城之穀梁又以公懼三家而脩內城然不可得而詳矣

季孫斯仲孫忌帥師圍鄆

仲孫何忌不言何闕文也鄆貳於齊故二卿帥師圍之其

專甚矣

七年

戊戌

春王正月

夏四月

秋齊侯鄭伯盟于鹹

左氏傳齊侯鄭伯盟于鹹衛地徵會于衛衛侯欲叛晉諸大夫不可

使北宮結如齊而私於齊侯曰執結以侵我齊侯從之乃盟于瑣瑣即沙也許氏曰伯道墮諸侯散離盟始復

志此蓋自是中國無殷會矣此特相盟也特相盟自齊桓以來未之有也於是再見諸侯無主盟矣是故書

石門以志諸侯之合書鹹以志諸侯之散此春秋之終始也召陵之會晉卿求賂諸侯皆貳齊鄭會鹹又徵

會于衛將以同叛晉也是時大國惟晉鄭齊衛又數背叛相侵伐齊晉兩國相為強弱晉強則同諸侯以附晉

晉弱則合諸侯以自強若魯衛鄭則視之以為向背也

齊人執衛行人北宮結以侵衛齊侯衛侯盟于沙

左氏傳見

上文 陽平元城縣東南有沙亭 齊盟鄭又盟
衛同叛晉也 晉景不足望齊盟鄭衛亦欲伯矣

大雩

齊國夏帥師伐我西鄙

魯事晉而齊叛之故伐我西鄙齊景乘晉之衰

無德以懷諸侯徒欲以力定伯不知其不可也

九月大雩 冬十月

八年

己亥春王正月公侵齊公至自侵齊

左氏傳公侵齊門于陽州至魯

陽虎用事無軍政故以侵書之而公亦以危至也

二月公侵齊三月公至自侵齊

左氏傳侵齊攻廩邱之郛

曹伯露卒

靖公卒子伯陽立

夏齊國夏帥師伐我西鄙

去年秋齊國夏來伐以魯之從晉也今年公出師報之也

不為無故然至於再興師而齊未嘗懼而求平亦未聞戰魯之出師凡三月勞民已甚於齊初無損益故兩書侵皆言公志其愧也齊之師再至則兩書伐我見齊強魯弱也

公會晉師于瓦公至自瓦

左氏傳晉士鞅趙鞅荀寅救我公會晉師于瓦瓦衛地

杜氏注東郡燕縣東北有瓦亭今滑州白馬縣不曰會晉士鞅而曰會晉師重師也以其來救故公逆會之

秋七月戊辰陳侯柳卒

懷公卒子閔公越立

晉士鞅帥師侵鄭遂侵衛

左氏傳秋晉士鞅會成桓公周卿士侵鄭圍蟲牢鄭邑報

伊闕也六年鄭伐周闕外晉為周報之遂侵衛許氏曰招攜以禮懷遠以德鹹沙之盟諸侯已貳晉不思德

禮之是務而欲恃力攘服則失霸何日之有報伊闕者假王命也襄之二十三年齊始叛晉取朝歌去年齊

盟鄭于鹹盟衛于沙鄭衛始叛晉於是晉侵鄭衛又明年及齊平雖魯亦叛晉矣

葬曹靖公 九月葬陳懷公

三月而葬速

季孫斯仲孫何忌帥師侵衛

左氏傳九月師侵衛晉故也魯為晉討衛

冬衛侯鄭伯盟于曲濮

曲濮衛地杜氏注結叛晉也衛鄭既叛晉晉侵之魯亦助之

曲濮之盟合謀以備晉魯也

從祀先公

杜氏注從順也先公閔公僖公也謂將正二公之位次也石氏本此意曰文二年躋僖公

此書從祀先公則魯之逆祀至此而順也馮氏謂從非訓順盤庚曰茲予大享于先王爾祖其從與享之曾子

問曰：裕于大廟，其主皆從歷代宗廟郊社之址，皆有五帝山川功臣從祀之址。然則從祀者，蓋言隨而祭之也。詳其事書曰：從祀先公，則昭公可知矣。不言昭公，內諱也。昭公卒于外，喪歸，意如尚欲溝絕其地域，不使與先君同。既而止葬其墓南，以是而觀，則昭公未得入廟也。明矣。五年，意如卒。六年，陽貨欲去三桓，尚厭魯人之心，始置昭公於先公之廟而祀焉。爾昭公入，則閔僖當祧去。廟中之昭穆正矣。胡氏引此說，言陽貨欲著季氏之罪，以取媚國人。其事雖順其情，則逆春秋原情制法，故不書禘事。與日特書從祀先公於盜竊寶玉大弓之上，見事出陽虎而不可詳也。

盜竊寶玉大弓

杜氏注：盜謂陽虎也。家臣賤，故曰盜寶。玉，夏后氏之璜，大弓，封父之繁弱。

以寶玉為封圭

玉夏后氏之璜

大弓為武王之戎弓

季孫

意如逐君專國，如此其強也。其子斯乃為家臣陽貨所

制而拘之虎欲順祀先公將享于蒲圃而殺之幸而公
飲處父知以告孟孫期孟孫以兵救陽虎前驅林楚御
桓子將如蒲圃桓子謂林楚往孟氏得免於難陽虎劫
公與武叔以伐孟氏公飲處父與陽氏戰又戰于棘下
陽氏敗陽虎如公宮取寶玉大弓以出入于譙陽闕以
叛經不書略家臣也寶玉大弓周公之分器魯國之
重寶陽虎竊之以奔將以賂外國求容也其後虎自以
不義之甚而歸之有國者不能保其世寶尚足為國乎
虎之叛則略而不書分器失則不可不書也意如卒未
久于斯幾為家臣所殺亦幸而免天之報施顯然若此
姦愼亦可
以鑒矣

九年

庚子

春王正月

夏四月戊申鄭伯蠆卒

獻公卒子
聲公勝立

得寶玉大弓

二物先代之寶失之書得之亦書不曰盜
歸寶玉大弓者盜微賤不可再見虎將走

齊畏齊人弗義其盜也故反之穀梁曰惡得之得之堤下或曰陽虎以解衆也

六月葬鄭獻

公三月而葬速

齊侯衛侯次于五氏

五氏晉地左氏傳齊侯伐晉夷儀克之晉車千乘在中年救夷儀也

衛侯將如五氏

齊侯在五氏將往助之卜過之龜焦衛至五氏道過中年衛侯曰可也衛車當其半寡人當其

半敵矣

衛侯怒晉不復顧卜欲以身當五百乘乃過中

牟中年人欲伐之衛褚師圍亡在中年曰衛雖小其君

在焉未可勝也齊師克城而驕其帥又賤遇必敗之不

如從齊乃伐齊師敗之齊侯致襍媚杏於衛三邑皆齊

西界以答謝衛意

齊伐晉夷儀克之猶畏晉未敢遽

進衛侯過中年往助之次于五氏齊為晉所敗經不言

伐而言次何也惡其伐盟主也凡言次皆緩也蓋二國

謀禦晉魯也然其實聲言伐晉以脅魯將俟其來求平

也故明年魯及齊
平亦同背晉矣

秦伯卒

哀公卒孫
惠公立

冬葬秦哀公

襄陵許氏曰秦自晉悼以後寢不見於春秋則知秦益退保西戎軍旅禮聘之事不

交於中
國矣

十年

辛丑

春王三月及齊平

杜氏注平前八年再侵齊之怨呂氏曰及齊平我志也

夏公會齊侯于夾谷公至自夾谷

夾公穀作頰夾谷魯地漢東海祝其縣有

夾山今海州懷仁縣左氏傳夏公會齊侯于祝其實夾谷孔丘相犂彌言于齊侯曰孔丘知禮而無勇若使萊人以兵劫魯侯必得志焉齊侯從之孔丘以公退奉公退曰士兵之令士官以兵擊萊人兩君合好而裔遠也

夷之俘以兵亂之非齊君所以命諸侯也商不謀夏夷
不亂華俘不干盟兵不偪好於神為不祥於德為愆義
於人為失禮君必不然齊侯聞之遽辟音闕又避之
趙氏曰案經不書盟傳何得云盟蓋左氏欲以歸汶陽
之田歸功夫子故為此說殊不知要而得之非聖人之
正故自遽辟之已下至齊侯將享公悉不取許氏曰
昭公以來魯滋以削君行必至蓋易危也
夾谷之會孔子正勝然猶至之存戒心也

晉趙鞅帥師圍衛

左氏傳報夷儀也晉人討衛而衛

無禮遂執佗殺之以求成亦不許何晉不思衛恃齊故
爾倘有以服齊則衛自來矣今圍之而不知懼徒以堅
齊之從耳

齊人來歸鄆謹龜陰田

鄆謹龜陰三邑皆汶陽田也
案傳魯公與齊侯會于夾谷孔

子攝相事具左右司馬以從以禮相見齊侯使萊人鼓譟欲執公孔子命司馬止之而折以禮齊侯愧又優施舞于幕下孔子使司馬誅之齊侯歸告其臣曰魯以君子之道輔其君而子獨以刑楚之道教寡人得罪於魯君有司對曰君子有過則謝以質小人有過則謝以文君若悼之則謝以質於是齊侯乃歸所侵魯之鄆汶陽龜陰之田以謝過成八年晉侯使韓穿來言汶陽之田歸之於齊想其時歸齊至此方返宣十年齊人歸我濟西田言歸不言來言歸又言我我則魯所欲也今之歸田程子所謂齊服義而來歸之故曰來歸使魯欲得故地縱以兵革攻伐否則厚幣巧辭以請亦未必能得聖人一言而以正勝齊侯心服內愧乃自歸之此聖人存神過化之妙有以啓其良心非智謀者倉卒所可為也

叔孫州仇仲孫何忌帥師圍郕秋叔孫州仇仲孫何忌

帥師圍郕

郕叔孫之邑初叔孫使馬正侯犯殺郕宰公若藐弗能而使圍人殺之侯犯以不能副叔

孫之命遂叛故叔孫與仲孫圍之弗克秋再圍之亦不服其強可知矣工師駟赤為叔孫謀俾侯犯事齊宣言

郕中齊人將遷郕民郕民駭圍侯犯犯出奔齊人致郕犯以郕事齊及奔齊乃致郕於魯三家專魯久矣至

是而家臣爭叛理宜然也今經直書大夫再帥師圍邑不出公命陪臣據邑以叛比事而觀天下事可知矣

宋樂大心出奔曹

宋使樂祁于晉晉執之八年樂祁歸卒于大行晉士鞅曰不如止其尸以

求成焉今宋公使樂大心樂族盟于晉且逆樂祁之尸

辭偽有疾樂祁之子溷怒而譖于公逐之溷責大心同

族不去樂大心責溷哀經生子大心辭

使宋公已怒之及溷之譖固易行也

宋公子地出奔陳

宋公子地嬖遽富獵分其室五分與獵有白馬四公嬖向魋魋欲之公朱

馬鬣尾以與魍地怒使其徒扶魍而奪之母弟辰使地奔以禮辟而請君止地君不聽辰亦奔地於己之嬖不吝公之嬖則吝亦偏於私矣宋公以嬖而失二弟友愛之義固可貶辰強挾二卿而出二卿亦見脅於辰俱可罪也

冬齊侯衛侯鄭游速會于安甫

安甫齊地地譜今屬鄆州平陰縣魯定之初

晉伯雖衰猶能會盟諸侯故城周之役侵楚之會臯鼫之盟鄭皆與焉及聲公即位晉伯會盟侵伐蔑然不舉故鄭始東結齊魯與晉為敵定十年會齊十一年平魯又泄盟至哀二年又與晉戰

叔孫州仇如齊

左氏傳武叔聘于齊杜氏注謝致邱也

宋公之弟辰暨仲佗石彊

苦侯切

出奔陳

傳見上劉氏曰諸侯之尊弟

兄不得以其屬通其弟云者以重書也何重乎宋公之弟辰言不能親親也暨者何及也猶暨暨也蓋強脅之也書宋公之弟辰交譏兄弟失道也書暨仲佗石彊出奔貶大臣不能自立為辰所脅而奔亦交譏之也

十有一年

壬寅

春宋公之弟辰及仲佗石彊公子地自陳

入于蕭以叛

蕭宋邑

劉氏曰其出也謂之暨其入也謂之及及非不得已之言也宋景嬖向

魋公子地怒魋而出奔公之弟辰請止地公不聽忿而挾二卿亦奔無大故輕於去國固可罪何未幾四臣據

宋邑自陷於叛逆其罪不可逭也書自陳者藉隣國之勢以叛陳之罪亦著矣

夏四月

秋宋樂大心自曹入于蕭

宋公以譖逐大心大心在曹聞宋公子地公之弟辰仲佗

石彊叛于蕭自曹往從之雖不書叛其叛可知矣

冬及鄭平

左傳始叛晉也杜氏注魯自僖公以來世服於晉至今而叛故曰始公六年侵鄭為晉

討也今及鄭平始叛晉也平不書必闕天下之大故而後書書渝平以志諸侯之合書及鄭平以志諸侯之散此春秋之所以終始也襄陵許氏曰夫晉之為晉自若也定亦未有他惡而諸侯離心焉者政在多門貨賄讒慝汨昏其間則無以令天下極於執樂祁也

叔還

音旋

如鄭涖盟

還叔詣曾孫案世族譜叔還是叔弓曾孫此云叔詣誤

十有二年

癸卯

春薛伯定卒

襄公卒君比立

夏葬薛襄公

叔孫州仇帥師墮

許規切

邱

三桓之邑皆為城以自固故其家臣恃險以叛仲由為季

氏宰將墮三都邱費成也

為三家忠謀墮毀其城使無所恃所以制陪臣抑私家而復強幹弱枝之勢也二邑

己墮而成獨不服雖公圍之亦不克邱費強難克而克之成最易而不克何耶蓋公歛處父謂孟孫墮成齊人必至北門且成孟氏之保障無成是無孟氏俾孟孫偽不知我將不墮故公圍成弗克齊人以孔子為政饋女樂三日不朝孔子遂行所以墮都之謀終於圍成而不果也

衛公孟彊帥師伐曹

左氏傳衛公孟彊伐曹克郊曹邑還又重十三年

季孫斯仲孫何忌帥師圍費

費季氏之邑三家不懼於禮擅城其邑雖欲墮之而

不從卒受其害公山不狃叔孫輒帥費人襲魯攻入公之側幸而伐之勝二子奔齊遂墮費家臣屬邑在國內而強悍不能制其亂極矣

秋大雩

冬十月癸亥公會齊侯盟于黃

黃齊地杜氏注盟結叛晉

十有一月丙寅朔日有食之

公至自黃

十有二月公圍成公至自圍成

成孟氏之邑公欽處

父先謂孟孫以為保障而不欲墮之故公圍之弗克邱費不易克二子皆墮之公圍成弗克其不足與有為也成國內之邑而書至者臣強君弱其危甚矣無異於外也

十有三年

甲辰

齊侯衛侯次于垂葭

垂葭衛地一名耶古閒反氏高平鉅野縣

有耶亭今屬濟州齊侯衛侯將使師伐晉次垂葭以為之援

夏築蛇淵囿

書不時也

許氏曰魯政不脩而非時勤民築囿奉已而已志不及國也夫圍成弗

克歸而力此

何振之有

大蒐于比

音蒲

夏蒐非時

昭十二年此年

大蒐于比蒲凡三十四年

衛公孟彊帥師伐曹

衛大夫連年專伐書以惡之已見前十二年

秋晉趙鞅入于晉陽以叛

案傳趙鞅謂邯鄲午曰歸我衛貢五百家舍諸晉陽鞅邑

午歸告其父兄皆曰不可衛以是故與邯鄲親而實晉陽絕衛之道也不如侵齊齊必來報懼齊而徙則衛與邯鄲之好不絕如之而歸之晉陽趙孟不察其謀怒而殺午趙稷午之子涉賓午家臣以邯鄲叛俾司馬圍邯鄲午荀寅之甥也午之母荀寅姊妹也寅范吉射之姻也荀寅子娶吉射女以殺午故伐趙氏鞅奔晉陽鞅之入拒范中行也而經書曰叛人臣不當專土也入者不順之名叛者不救之罪

冬晉荀寅士吉射入于朝歌以叛

荀躒言於晉侯曰三臣始禍而獨逐鞅刑

已不鈞矣請皆逐之冬十一月荀躒韓不信魏曼多奉公以伐范氏中行氏二子敗丁未荀寅士吉射奔朝歌此書法與上同三叛臣之罪均也皆强悍不知有君晉室自是微矣朝歌晉地衛州衛縣西有朝歌城南有牧野

晉趙鞅歸于晉

左氏傳韓魏以趙氏為請十二月辛未趙鞅入于絳盟于公宮蘇氏曰鞅寅吉

射之叛其罪均也鞅以有助故得復韓魏與范氏中行氏相惡今乘其陳告公伐之而請復趙欲使二子益忿

寅吉射以無援故終叛春秋無所與也鞅之言歸寅吉射既出則無難也晉國載書始禍者死鞅之欲益衛

貢殺邯鄲午非始禍乎晉侯既不能致辟於鞅反從韓魏之請俾已叛者復歸于晉無政刑矣此韓趙魏分晉

之本也歸易辭也叛而歸言其自如亂之甚也

薛弒其君比

胡氏曰稱國以弒當國大臣之罪也。比弒而惠公夷立又名寅。

十有四年

乙巳

春衛公叔戌來奔衛趙陽出奔宋

左氏傳初衛公

叔文子朝而請享靈公退見史鰌而告之史鰌曰子必禍矣子富而君貪罪其及子乎文子曰然吾不先告子是吾罪也君既許我矣其若之何史鰌曰無害子臣謂文子能執臣禮可以免富而能臣必免於難上下同之戌也驕其亡乎文子卒衛侯始惡於公叔戌以其富也公叔戌又將去夫人之黨宋朝之徒夫人愬之曰戌將為亂春衛侯逐公叔戌與其黨故趙陽奔宋趙陽趙厲孫親富不親仁胡氏曰衛侯不能正家以喪其大臣戌又以富見惡於衛侯夫富怨之府也使戌積而能散以財發身不為貪人之所怨於以保其爵位倘庶幾乎

二月辛巳楚公子結陳公孫佗人帥師滅頓以頓子牂

音歸

左氏傳頓子牂欲事晉背楚而絕陳好二月楚滅

頓

頓子小邦欲事晉背楚陳附楚者也故又絕

其好頓子知慕中夏盟主而事之其好尚固可取也殊
不思晉之伯衰諸侯俱叛一旦楚陳來伐誰能救之坐
待其亡以取困辱公孫佗人以中國之大夫而從荆楚
以滅人之國其惡甚矣以頓子歸不言歸陳歸楚蓋以
二國滅人之惡為重故不暇別以歸何國也
頓子書名責其不能死位無復國之志也

夏衛北宮結來奔

左氏傳北宮結來奔公叔戌之故也

五月於越敗吳于檣李吳子光卒

檣公羊作醉檣李吳郡嘉興縣南醉李城

左氏傳吳伐越越子句踐禦之陳于檣李句踐患吳之
整也使死士再禽焉不動使罪人三行屬劍於頸而辭
曰二君有治臣奸旗鼓不敏於君之行前不敢逃刑敢
歸死遂自剄也師屬之目越子因而伐之大敗之靈姑

浮以戈擊闔廬闔廬傷將指足大指取其一屢還卒于
陘去構李七里夫差使人立於庭苟出入必謂已曰夫
差而忘越王之殺而父乎則對曰唯不敢忘三年乃報
越哀公元年吳王夫差敗越于夫椒報構李也遂入越
越子以甲楯五千保于會稽使大夫種因吳大宰嚭以
行成吳子將許之伍員曰不可臣聞之樹德莫若滋去
疾莫如盡句踐能親而務施施不失人親不棄勞與我
同壤而世為仇讎於是乎克而弗取將又存之違天而
長寇讎後雖悔之不可食已姬之衰也日可俟也介在
蠻夷而長寇讎以求伯必不行矣弗聽退而告人曰越
十年生聚而十年教訓二十年之外吳其為沼乎三月
越及吳平許氏曰書構李之敗用見吳光玩兵滅身
以為殘民伐國之戒書越敗吳下曰吳子光卒隱然
示光因敗傷而卒也不言爵不言師不言戰皆所以外
而略之也書敗者詐戰也哀元年吳
子敗越吳越不告故魯史冊不書

公會齊侯衛侯于牽公至自會

左氏傳晉人圍朝歌以范中行氏據朝歌公會

齊侯衛侯于脾上梁之間即牽地謀救中行氏三國之君同為范中行為會而助不衷故至公以危之也

秋齊侯宋公會于洮

洮曹地左氏傳范氏故也許氏曰齊魯宋衛崇獎逆亂謀動干戈

大義亡矣

天王使石尚來歸脤

市軫切石尚稱名固知為天子之士而非大夫然亦當稱王人君

既不以禮使之尚亦以非禮行故書名以貶之也脤祭肉也脤曰脤熟曰臠禮助祭則受胙天子於諸侯固有歸脤之禮魯未嘗助天子之祭而天子遣使越千里而歸脤非禮也經特書以示譏焉

衛世子蒯聵出奔宋

劉氏權衡曰衛世子蒯聵出奔宋左氏叙蒯聵欲殺夫人夫人啼而

走公執其手以登臺太子出奔宋子謂蒯瞶雖不善謀安有此事哉且殺夫人蒯瞶獨得全乎彼所羞者以夫人名惡也如殺其母為惡愈大反不知可羞乎蓋蒯瞶聞野人之歌其心慙焉出謂夫人夫人惡其斥己之淫則啼而走言太子將殺余以誣之靈公惑於南子所言必聽從故外則召宋朝內則逐公叔戌趙陽彼不恥名宋朝固亦不難逐蒯瞶矣此其真也不當如左氏所記又蒯瞶出乃奔宋宋南子家也蒯瞶負殺南子之名而走入其家使真其事者敢乎哉此亦一證也常山劉氏曰蒯瞶出奔春秋不去其世子者衛侯之臯也南子之惡亦已甚矣其欲去世子之意亦已明矣如哀姜亂魯驪姬亂晉若此者不鮮矣而靈公聽南子之譖謂蒯瞶欲弑其母不能為辨明以致其出奔豈非靈公之罪乎哀二年晉趙鞅納世子蒯瞶于戚亦書世子同此義張氏曰考二劉之言足以知左氏所記乃南子之讒言而非當時之實錄也不然春秋至趙鞅之納猶與以世子

之名
何哉

衛公孟彊出奔

左氏傳衛太子奔宋盡逐其黨故公孟彊奔鄭自鄭奔齊

宋公之弟辰自蕭來奔

辰嘗奔陳自陳入于蕭以叛今又自蕭奔魯魯不惟不能討又

從而容受之何耶

大蒐于比

音毗 蒲 大蒐于比蒲凡三詳見前年

邾子來會公

方蒐而邾子來會則

知公在蒐所矣而不書公以軍政久不屬公皆季孟為之也邾子來不以朝禮故但書來會而蒐又非宜會之處故明年邾子復來朝魯

城莒父及霄

音甫 莒父霄魯二邑杜氏云公叛晉助范氏故懼而城二邑 此年無冬史闕文

十有五年

丙午

春王正月邾子來朝

左氏傳邾隱公來朝邾子益

鼯鼠食郊牛牛死改卜牛

公羊傳曷為不言其所食漫也漫徧也徧食其身杜氏注

不言所食舉死重也趙氏曰子早年嘗怪鼯鼠食郊牛致死上元二年因避兵于會稽時有水旱癘疫之苦至明年牛災小鼠能噬牛才傷皮膚無不死郊天子祭天地也魯僭禮屢致災變神不享非禮可知矣而當時君臣不悟猶改卜牛聖筆因事書之以志非禮致變也

二月辛丑楚子滅胡以胡子豹歸

楚滅胡書楚子爵其胡子豹書名罪在豹

也吳入楚胡子乘亂盡俘其邑之近者以歸小國不安分而暴虐若此楚既定又不事楚是自取滅亡故楚子滅之罪不在楚也又不能死位而楚以之歸亦當書名貶之也

夏五月辛亥郊

公羊傳曷為以夏五月郊三卜之運也運轉也已卜春三正不吉復轉卜夏三

月周五月得二吉故五月郊三卜不吉已見神不饗非禮而又再三瀆之瀆則不告矣雖二吉猶不當為也

壬申公薨于高寢

高寢宮名不薨于路寢非正也襄陵許氏曰春秋所大正始與終禮卒

以正終也內卒凡十四公得正而薨焉者唯莊宣成是以君子務力於禮而順命之變又何求焉

鄭罕達帥師伐宋

左氏傳鄭罕達敗宋師于老邱邱宋地宋公子地奔鄭鄭人為之伐

宋欲取地以處之在哀十二年公子地奔鄭宋鄭之間有隙地六邑彌作頓邱玉暢品戈錫子產與宋人為

成曰勿有是鄭人將以處公子地故伐以取之許氏

曰宋大國也資王伯之餘業至于景公而鄭能困之則

桓魋為之也無競

維人豈不信哉

齊侯衛侯次于渠蒧

公羊作蒧蒧次于蒧挈

左氏傳齊侯衛侯

齊

宋去年方會今為宋出次緩辭也不書救不誠于救也

邾子來奔喪

禮天子崩諸侯奔喪會葬自周之衰諸侯廢此禮邾滕近魯之小國魯定公之喪邾

子來奔喪及葬滕子來會葬以天子之禮待列國非正也自是諸侯奔喪由邾子始然不過以強弱利害行之耳

秋七月壬申妣氏卒

劉氏曰此要為哀公之母定公之妾哀公未成君故亦未敢謂其母

為夫人耳石氏曰其為妾也故其歸不幣不迎不至子未成君也故其死不薨不諡不葬不小君也纂例曰自成風之後妾母皆僭用夫人禮故亦書薨著其非禮也哀公母定姒卒時子未踰年雖行喪禮不可加於母故書卒

八月庚辰朔日有食之

九月滕子來會葬

邾子奔喪滕子會葬皆非禮也以見大國恃力而小國因事以求說也呂

氏曰邾子來奔喪畏魯甚也滕差遠而大於邾故但來會葬此專以利害強弱為國者也

丁巳葬我君定公雨不克葬戊午日下昃乃克葬

穀梁傳葬

既有日不為雨止禮也雨不克葬喪不以制也戊午日下昃乃克葬乃急辭也不足乎日之辭也已定丁巳

日葬雨不克葬戊午日下昃乃葬非禮也無雨備故待霽而後葬與宣八年葬敬嬴同書實事以示譏也

辛巳葬定姒

公羊傳定姒何以書葬未踰年之君也有子則廟廟則書葬非夫人而書葬定姒

宜矣

冬城漆

邾庶其以漆閭邾來奔則此城漆者庶其邑也魯嘗受叛人規叛邑今城而固有之非義也張

氏曰城漆謀伐邾也定公之喪邾子來奔事魯謹矣哀公初立不務善隣而以土地之故勞民力啓隣怨二年取其田七年俘其君卒使吳人乘閒以伐其國齊人問罪而取讎闢利未得而害隨之謀國如此其不終也宜哉

讀春秋編卷十一

欽定四庫全書

讀春秋編卷十二

宋 陳深 撰

哀公

名蔣定公之子定姒所生諡法恭仁短折曰哀

元年丁未春王正月公即位

楚子陳侯隨侯許侯圍蔡

左氏傳楚子圍蔡報栢舉也定四年蔡人男女以辨男女

各別係累而出降使疆于江汝之間而還楚使徙國江之北汝之南蔡於是請遷于吳楚既還蔡更叛楚就吳

隨漢東之國自楚武見伐之後不復見者一百四十餘年未嘗列諸侯之會蓋世服於楚也吳師入郢楚子奔隨而隨獨免之卒復楚國故德之而使列於諸侯今得見於經定六年許為鄭所滅未久復見楚封之也經

不書不與中國制在強楚也楚師遷蔡經止書圍蔡蓋蔡嘗以吳師入楚幾亡其國楚復讎之事可恕也故書楚子圍蔡而稱爵恕楚之辭也

鼯鼠食郊牛改卜牛夏四月辛巳郊

春秋書郊終於此魯郊非其禮而又

非其時故牲被災害比比有之經削而不書則無以見其失禮盡書之則有不勝書故聖筆因其變而志其失以示戒也

秋齊侯衛侯伐晉

左氏傳齊侯衛侯次于乾侯救范氏也師及魯師齊師衛孔圍鮮虞人伐

晉

魯不書非公命

取棘蒲晉地

許氏曰霸主奉王以

正天下而諸侯至於合從以伐之春秋特書以著中國之無霸也王道既盡霸統復亡春秋之變至是而窮矣

冬仲孫何忌帥師伐邾

定十四年邾子來會十五年邾子來朝其年定公薨邾子來奔

喪邾之事魯甚謹定公喪甫薨而仲孫何忌伐邾書之以見內惡也

二年

戊申

春王二月季孫斯叔孫州仇仲孫何忌帥師伐

邾取鄆

火號反又音郭

東田及沂西田

左氏傳春伐邾將伐絞邾邑邾人愛其土故賂

以鄆沂之田而受盟襄十九年魯嘗取邾田自鄆水今三卿帥師伐邾又取鄆東沂西之田三家伐國非君意取田以入已私也經列書之以彰其惡魯兩納邾叛人邑三取其田幾何而不盡也三家恃強凌弱不道甚矣以中國伯衰故無所忌憚也

癸巳叔孫州仇仲孫何忌及邾子盟于句繹

句音鉤邾地春秋

書盟止此自是內外盟皆不書不足書也 劉氏曰曷為三人伐而二人盟季孫臨之叔仲成之季孫之汰也蓋自謂猶君矣 三家政由已出既取邾田又強要之盟邾何敢弗從紆其滅亡幸矣經列書之以著其惡

夏四月丙子衛侯元卒

靈公卒世子蒯聵出奔在外聵之子輒立

滕子來朝

滕來朝凡四今止此

晉趙鞅帥師納衛世子蒯聵于戚

經書衛世子本其當立也書納于戚不予衛輒

拒父之惡不言自著矣聵雖出奔靈公未嘗有命廢之後欲立郕郕辭遂止及公卒而聵之子輒立則立輒非君命也使輒知其命之非正逆其父而還以位則子道順而國定矣奈何輒貪國而不知有父堅拒其入聵居戚十三年因孔悝之臣乃得入而輒始奔魯是滅其天性絕其天倫不可立於天壤間矣尚何足以君國乎經

書鞅納衛世子鞅不降書人得無貶焉則知所納善也與晉人納捷菑于邾者異矣

秋八月甲戌晉趙鞅帥師及鄭罕達帥師戰于鐵鄭師

敗績

鐵衛地在戚城南姚即罕達子般駟宏

左氏傳齊人輸范氏粟鄭子

遇于戚甲戌將戰郵無恤御簡子即鞅衛太子為右登鐵上鄭人擊簡子中肩斃踣也於車中獲螭旗太子救之以戈鄭師獲溫大夫趙羅太子復伐之鄭師大敗獲齊粟千車皆言帥師其衆敵也戰而言及之者主之者也猶曰晉趙鞅為志乎為此戰也云爾兩不足書侵伐無客主也罕達送輸而趙鞅禦之也

冬十月葬衛靈公

七月而葬緩

十有一月蔡遷于州來蔡殺其大夫公子馮

左氏傳吳洩庸如蔡

納聘而稍納師師畢入衆知之蔡侯告大夫殺公子駟以說殺駟以說于吳言不時遷駟之所為哭而遷墓將遷與先君辭楚圍蔡蔡降使疆于江汝楚師還又背楚請遷于吳吳許之又悔吳以師臨蔡蔡侯懼告大夫殺公子駟以說於是徙于州來書大夫而稱國以殺君與用事大夫擅殺之也蔡悔請遷及吳師入委罪於人自此誰為盡忠以謀其國宜乎上下危疑旋致禍敗也

三年

己酉

春齊國夏衛石曼姑帥師圍戚

左氏傳齊衛圍戚求援于中山

鮮虞也

衛石曼姑為衛輒圍戚而書齊國夏先之者

子不可以加父臣不可以加君也特書以誅其惡許

氏曰觀乎蒯聵之亂則齊景之不霸可知矣晉以君臣稱兵而齊為臣伐君衛以父子爭國而齊助子圍父以

是令於諸侯君子是以知齊之將亂也

夏四月甲午地震

地震凡五詳見文九年

五月辛卯桓宮僖宮災

左氏傳夏五月辛卯司鐸火宮名火踰公宮桓僖災孔子在陳

聞火曰其桓僖乎天子七廟諸侯五廟親盡則毀桓僖不毀非禮也三家以出於桓而立於僖以是為悅者桓至此十世僖至此七世矣僭而存之瀆禮之甚天變豈虛加哉

季孫斯叔孫州仇帥師城啓

公羊作開陽杜氏注魯黨范氏

啓陽今琅邪開陽縣

襄陵許氏曰所城近敵故帥師

馬元年鼠食郊牛三年地震宗廟災變異之弗圖而取田城邑兵役相繼可謂不畏天命矣中失而外鍵本亡而未務此魯之季世也

宋樂髡帥師

伐曹

以十年宋大心奔曹而助之故也

秋七月丙子季孫斯卒

左氏傳季孫有疾命正常桓子之寵臣曰無死南孺子之子季

桓子之妻

男也則以告而立之女則肥季康子也可季

孫卒康子即位既葬康子在朝南氏生男正常載以如

朝告曰夫子有遺言命其圍臣曰南氏生男則以告於

君與大夫而立之今生矣男也敢告遂奔衛康子請退

公使共劉魯大夫視之則或殺之矣乃討之討殺者召

正常正常不反畏康子也康子聞桓子有遺男不須

遽請退當令鞠育之俟其長而還以位則善矣正常言

未幾而奔公使共劉視之則已殺之矣康子偽勇於退

而使人戕之也貪位而

忍心如此不義甚矣

蔡人放其大夫公孫獵于吳

杜氏注公子駟之黨放公孫獵書大夫而稱人言

國亂無政衆人擅放之也

冬十月癸卯秦伯卒

惠公卒悼公立

叔孫州仇仲孫何忌帥師圍邾

去年伐邾取田與邾子盟今年又圍邾皆叔仲

貪利忘信也經詳書以志其惡

四年庚戌春王二月庚戌盜殺蔡侯申蔡公孫辰出奔吳

左氏傳蔡侯將如吳諸大夫恐其又遷也承音懲楚音也公孫翩逐而射之入于家人而卒以兩矢門之衆

莫敢進文之錯後至曰如牆而進多而殺二人錯執弓而先翩射之中肘錯遂殺之故逐公孫辰而殺公孫姓

公孫盱即公孫霍蔡侯誑吳乃委罪執政以說人心危疑又將如吳大夫懼其復遷公孫翩逐而射之卒蔡

人殺翩公孫辰奔蔡殺公孫姓公孫霍疑皆翩之黨也翩之黨猶名則翩非微者也非微者而稱盜蓋一旦竊

發爾國君行有軍從居有衛兵而為盜所殺其君之不知道可知矣胡氏所謂變文書盜以警有國者之君也書盜殺蔡侯申繼書公孫辰出奔見辰亦與聞乎弑畏人疑之而自逸耶經去其官亦微見矣

葬秦惠公 宋人執小邾子

許氏曰天下無霸故宋得以執小邾子伐鄭入曹而無所忌

夏蔡殺其大夫公孫姓公孫霍

蔡侯既為盜殺未久主殺二大夫者誰與當時

用事之臣也故前輩疑蔡下闕一人字蔡人殺二大夫以其翽之黨春秋稱國以殺而不去其官以專殺大夫之罪書之蓋以其黨罪未明而失刑耳

晉人執戎蠻子赤歸于楚

楚圍蠻氏蠻氏潰蠻子赤奔晉陰地河南山北楚使謂陰

地之命大夫曰晉楚有盟好惡同之若將不廢則寡人之願也不然將通少習商嶺武關以聽命趙鞅曰晉國

未寧安能惡楚必速與之乃詐執我蠻子以畀楚師
經書晉人貶之也戎蠻失地窘窮奔于晉之河南山北
楚人求之晉人詐執之不仁也執而歸之楚不義也以
中國之霸主而歸夷狄之俘不競至此可哀也已僖二
十八年晉侯執曹伯畀宋人今曷云歸于楚胡氏謂猶
京師楚也畏楚之強也呂氏曰春秋之世諸侯視強弱
相侵伐以相取下動失其
正人理絕滅不道之甚也

城西郭

魯城西郭
以備晉也

六月亳社災

亳即殷也亳社殷社也殷都于亳武王克
商而班其社於諸侯以為亡國之戒社者

封也亡國之社以為廟屏戒也記曰喪國之社屋之不
受天陽也又曰亳社北牖使陰明也天火曰災亳社災
屋之故有此災此制計必始于湯也亡
國之社災變之大也書之以記災也

秋八月甲寅滕子卒

頃公卒隱公虞母立

冬十有二月葬蔡昭公 葬滕頃公

五年

辛亥

春城毗

毗魯邑城之以備晉也善隣連年懼晉城邑定十四年城莒父

魯不能親仁

及霄十五年又城漆哀三年城啓陽去年城西郭今年城毗明年又城邾瑕勞民以興土功經屢書之以示貶也

夏齊侯伐宋 晉趙鞅帥師伐衛

左氏傳趙鞅伐衛范氏之故也遂圍中牟

秋九月齊侯杵臼卒

左氏傳齊燕姬生子燕姬景公夫人生嫡子不成而死未冠不成人

諸子鬻如景公妾之子荼嬖茶即安孺子諸大夫恐其為大子也言於公曰君之齒長矣未有太子若之何公

曰二三子間於憂虞則有疾疾亦姑謀樂何憂於無君
景公欲立荼未發姑以此塞大夫之請公疾使國惠子
國夏高昭子高張立荼寘羣公子于萊秋齊景公卒冬
十月公子嘉公子駒公子黔奔衛公子鉏公子陽生來
奔

冬叔還如齊

閏月葬齊景公

閏月喪事不數葬齊景公非禮也春秋二百四

十二年唯文七年不告月此年葬齊景公爾皆譏其變
常也春秋不書閏月此其書閏何也喪事不數閏譏
其閏月葬也

六年

壬子

春城邾瑕

杜氏注任城亢苦浪又音剛父縣北有邾婁城今濟州任城縣地也劉氏

曰或邾之瑕也或曰內邑也魯自背晉數年間凡八
城邑懼晉來伐以嚴守備勞民極矣未聞修德布政以

自力經屢書
之以示貶也

晉趙鞅帥師伐鮮虞

左氏傳晉伐鮮虞治范氏之亂也四年鮮虞納荀寅于柏人

吳伐陳

左氏傳吳伐陳修舊怨也吳之入楚也使召陳懷公懷公朝國人而問焉逢滑陳大夫曰臣

聞國之興也視民如傷吳日敝於兵暴骨如莽而未見德焉禍之適吳其何日之有陳侯從之及夫差克越哀

二年

侵陳今又復修舊怨楚子曰吾

先君與陳有盟不可以不救乃救陳

夏齊國夏及高張來奔

左氏傳齊陳乞偽事高國者言諸大夫將棄子之命子早圖之

又謂諸大夫曰二子禍子矣盍及其未作也先諸大夫從之六月戊辰陳乞鮑牧及諸大夫以甲入于公宮昭子聞之與惠子乘如公戰于莊敗國人追之國夏奔莒遂及高張晏圉弦施來奔陳乞將立陽生乃與諸大

夫謀先逐高國高國去陳乞弑君之謀得肆矣高國並為世臣一時阿君廢長立少既受命又不能全陳乞諂事而不察其詐謀反覆卒墮其術中故書名以罪之也

叔還

音旋

會吳于相

祖楚地相故往會之

叔還以吳在始結吳好

秋七月庚寅楚子軫卒

楚子在城父將救陳卜戰不吉退不吉將戰王有疾卒于城

父子章立

齊陽生入于齊

齊陳乞弑其君荼

書齊陽生入于齊繼書陳乞弑其君

茶見陽生與聞乎故也陽生已奔魯何為而遽入于齊陳乞召之來也乞召之來匿於其家將以之為君也以之為君必去茶也茶之弑乃陽生令朱毛遷於駘而殺諸野幕之下經何以書陳乞弑其君茶陳乞以計出高

國意在立陽生高國去乃召陽生入則首禍者陳乞也
豈非乞弑荼乎加陽生以弑君之罪則陳乞弑立之迹
不明書陽生之入而陳乞弑君則陳乞之惡著而陽生
與有罪焉然陽生不書公子者以其廢父命篡荼以自
立是自絕于先君豈復得為先君之子也不稱公子誅
不予也稱齊陽生者程子謂見景公廢長立少以啓亂
也

冬仲孫何忌帥師伐邾 宋向巢帥師伐曹

七年

癸丑

春宋皇瑗帥師侵鄭

左氏傳宋師侵鄭鄭叛晉也定八年鄭始叛

之役定十五年鄭以宋公子地來奔欲取地以處之故
伐宋搆怨自此始至是宋侵鄭此後各取其師以逞其
暴是時伯衰故恣其所為也

晉魏曼多帥師侵衛

左氏傳晉師侵衛衛不服也五年晉伐衛至今未服

夏公會吳于鄆

才陵切鄆今琅邪鄆縣會吳于鄆吳來徵百牢于服景伯對曰

左氏傳夏公

先王未之有也吳人曰宋百牢我魯不可以後宋且魯
牢晉大夫過十吳王百牢不亦可乎景伯曰晉范鞅貪
而棄禮以大國懼敝邑故敝邑十一牢之君若以禮命
於諸侯則有數矣若亦棄禮則有淫者矣周之王也制
禮上物不過十二以為天之大數也今棄周禮而曰必百
牢亦惟執事吳人弗聽景伯曰吳將亡矣棄天而背本
不與必棄疾於我乃與之吳恃强大欲霸中國魯會
吳于鄆徵百牢景伯以周禮折之弗聽魯以吳棄禮知
其不能霸也

秋公伐邾

八月己酉入邾以邾子益來

季康子欲伐邾饗大夫謀

之子服景伯曰小所以事大信也大所以保小仁也背大國不信伐小國不仁民保於城城保於德失二德者危將焉保康子不樂而出康子為景伯道破伐小國不仁乃推公伐無故而入人之國處其宮晝夜掠此何異大盜魯以禮義之國而忍為之是皆季孫恃強凌弱貪利專恣而無忌憚也明年吳為邾來伐齊人來取二邑自貽其辱然後乃歸邾子益于邾始懼吳齊矣經書而不諱以示戒於後也邾子益何以名以其虜服也不言滅者邾既滅茅夷鴻保於茅請救于吳故明年吳伐魯魯復邾子故不言滅

宋人圍曹 冬鄭駟弘帥師救曹

左氏傳宋人圍曹鄭桓子思曰宋人有曹

鄭之患也不可以不救冬鄭師救曹侵宋

八年甲寅春王正月宋公入曹以曹伯陽歸

此滅曹也其不言滅何也

曹伯陽好田弋曹之鄙人公孫彊獲白鴈獻之且言田弋之說說之因訪政事太說之彊言霸說於曹伯曹伯從之乃背晉而奸宋宋人伐之晉人不救書曰宋公入曹而不書滅言自滅也猶虞之滅言晉人執虞公而不言滅也宋去冬築五邑於曹郊圍之春宋公伐曹將還褚師子肥殿曹人詬之不行師待之公聞之怒命反之遂滅曹執曹伯及司城彊以歸殺之趙氏曰經不書殺故宜略之

吳伐我

吳為邾故來伐不言四鄙直言伐我兵加于國都也吳師首克武城克東陽進舍於五梧明日

舍于蠶室明日舍于庚宗遂次于泗上吳人行成盟而還魯恥城下之盟因諱而不書也

夏齊侯取讎及闡

讎濟北蛇邱縣西有下讎亭今襲慶府襲邱縣闡魯闡鄉漢為剛縣故城

在襲邱縣

左氏傳齊悼之來也

季康子以妹妻之即位而逆之季魴侯康子叔父通焉女言其情弗敢與也

齊侯怒夏五月齊鮑牧帥師取謹及闡程子曰內失邑不書君辱當諱也不能保其土地人民是不君也已與之彼以非義而受則書取此與濟西田是也魯入邾以其君來致齊怒吳伐故賂齊以說之許氏曰外取邑不書以即歸我故書之也

歸邾子益于邾

齊侯以康子不與季姬又邾子齊甥魯執之以歸齊使吳請師將以伐我故懼

而歸邾子秋及齊平且逆季姬以歸

秋七月 冬十有二月癸亥杞伯過卒

僖公卒閔公維立

齊人歸謹及闡

左氏傳季姬嬖故也

九年乙卯春王二月葬杞僖公

杜氏注三月而葬速

宋皇瑗帥師取鄭師于雍邱

杜氏注雍邱縣屬陳留今開封鄭武子賸即軍建

嬖許瑕許其外取邑故許瑕圍宋雍邱宋皇瑗圍鄭師壘合鄭師哭于姚救之大敗二月甲戌宋取鄭師于雍邱趙氏曰悉俘之曰取取者得之稱任氏曰取者腹背受敵無所逃命而惟我之所得也春秋未嘗書取某師惟宋鄭二事而已或以取字即敗字之誤鄭罕達輕許嬖人以利而動擅弄兵以圍人之邑徒喪師敗律以殘民命罕達之罪也

夏楚人伐陳

左氏傳陳即吳故也

秋宋公伐鄭

杜氏注報雍邱

冬十月

十年

丙辰

春王二月邾子益來奔

左氏傳邾隱公來奔齊甥故遂奔齊

公會吳伐齊

左氏傳九年春齊侯使公孟綽辭師于吳
吳子曰昔歲寡人聞命今又革之不知所

從將進受命于君十年公會吳子邾子邾子伐齊南鄙
師于鄆齊地齊人弑悼公赴于師吳子三日哭于軍門

之外徐承帥舟師將自海入齊齊人敗之吳師乃還
常山劉氏曰公會夷狄伐中國諸侯具文可見其罪

三月戊戌齊侯陽生卒

公會吳伐齊齊人弑悼公以說
而以疾赴于師春秋不著齊人

弑君之罪而以卒書胡氏謂不忍以附吳之賊加中國
之君也其存天理之意微矣魯入邾以其君來齊侯
取謹及闢如吳請師討之魯懼而歸邾子齊歸謹及闢
使使辭師于吳吳子怒反約魯伐齊魯畏吳不敢不從
遂伐齊南鄙師于鄆齊用事諸臣竟不思禦之道遽
弑悼公以說于吳使齊戰而敗績危在旦夕亦不可行
弑逆以抒難意悼公猜忍而無人君之度其用事大臣
必有疑忌或悼公欲殺用事者以說而謀泄反為用事

者弑之以解兵禍齊之臣子其罪固不可勝誅矣而經止以卒書者不忍中國之君為吳夷來寇而罹此凶也如是書法斷自聖心此游夏不能贊一辭也

夏宋人伐鄭

宋去年春取鄭師秋又伐鄭今年夏又伐鄭春秋惡其修怨不已悉書以示貶

晉趙鞅帥師侵齊

左氏傳趙鞅帥師伐齊取犂及轅犂一名隰皆齊地毀高唐之郭侵及賴

而還齊方有喪晉人伐之非禮乘閒以竊利耳經書實事以見其罪

五月公至自伐齊

葬齊悼公

悼公弑簡公壬立

衛公孟彊自齊歸于衛

彊蒯聵之黨輒方拒父何敢歸也必齊納之也

薛伯夷卒

惠公卒

秋葬薛惠公

冬楚公子結帥師伐陳

吳救陳

左氏傳冬楚公子期伐陳陳即吳故吳延

州來季子救陳謂子期曰二君不務德而力爭諸侯民何罪焉我請退以為子名務德而安民乃還吳季札壽夢少子也壽夢以襄十二年卒至今七十七歲壽夢卒季已能讓國年當十五六至今蓋九十餘矣劉氏曰推驗季子年僅百歲彼其清高不污寧貪將亂國之兵者邪似異時事傳附著為說耳春秋凡書救未有不善之也吳救陳何獨以號舉而不進之也以吳純用貪亂之道也楚伐陳列國坐視而不敢救楚伐而吳救之故變而書號而傷中國之哀故書救亦止於此也

十有一年

丁巳春齊國書帥師伐我

齊國書伐我為前年公會吳伐齊師于鄆

故冉求為季氏宰勉季孫主乎戰以禦齊師及齊師戰于郊冉求之師能用矛入於齊軍獲甲首八十齊人不能師遁胡氏曰春秋之記斯師特曰伐我者欲省致師之由而躬自厚也垂訓之義大矣

夏陳袁

左氏穀梁作轅頗

破可反又平聲

出奔鄭

左氏傳初轅頗為司徒賦封田封內之田

悉賦稅之以嫁公女有餘以為已大器鑄鐘鼎之屬國人逐之故出許氏曰春秋書袁頗之奔所以為人臣附上以刻下托公以營私者之戒也

五月公會吳伐齊 甲戌齊國書帥師及吳戰于艾陵

齊師敗績獲齊國書

案傳為郊戰故公會吳子伐齊五月克博壬申至于贏甲戌戰于艾

陵展如吳大夫敗高子國子敗胥門巢吳大夫王卒助之大敗齊師獲國書公孫夏閭邱明陳書東郭書革車

八百乘甲首三千以獻于公 公再會吳伐齊戰于艾陵不言公者公與上伐不與下戰也公何為不與戰齊主與吳戰不為魯也獲齊國書戰而言及之者主之者也猶曰國書為志乎此戰也云爾

秋七月辛酉滕子廬母卒 冬十有一月葬滕隱公衛

世叔齊出奔宋

左氏傳衛太叔疾即世叔齊疾娶于宋子朝其娣嬖子朝出孔文子

使疾出其妻而妻之疾使侍人誘其初妻之娣寘于犂而為之一宮如二妻文子怒欲攻之仲尼止之遂奪其妻或淫于外州外州人奪之軒以獻恥是二者故出 疾在宋處樂死焉

十有二年

戊午

春用田賦

左氏傳十一年季孫欲以田賦邱賦之法因其田財通出馬一

尼牛三頭今欲別其田及家財各為一賦故言田賦使冉有訪諸仲尼仲尼曰丘不識也三發卒曰子為國老

待子而行若之何子之不言也仲尼不對而私於冉有曰君子之行也度於禮施取其厚事舉其中歛從其薄如是則以邱亦足矣邱十六井出戎馬一匹牛三頭此賦歛之常法若不度於禮而貪冒無厭則雖以田賦將又不足且子季孫若欲行而法則周公之典在若欲苟而行又何訪焉弗聽十二年春用田賦許氏曰先王之法九夫為井四井為邑井邑未有賦也四邑為邱邱十六井乃有牛馬之賦今以邱為不足也於是更用田賦藉井而取之不待及邱此非禮也古者蓋田有稅邱有賦稅以足食賦以足兵何氏注田謂一井之田賦者歛取其財物也言用田賦者若今漢家歛民錢以田為率矣不言井者城郭里巷亦有井嫌悉賦之禮稅民田不過什一軍賦十井不過一乘哀公外慕強吳空盡國儲故復用田賦過什一書曰用田賦用者不宜用者也宣公初稅畝而既益其稅矣成公作邱甲而又增其賦矣於此又欲變而別以田為賦則歛愈重而民愈困

矣

夏五月甲辰孟子卒

昭公夫人吳女也其曰孟子諱取同姓也吳與魯同姓在禮娶妻不

取同姓買妾不知其姓則卜之所以厚別也昭公之取孟子徒欲一時結好強吳以去三家悖禮甚矣春秋隱之來不書至卒不書薨葬不夫人不諡不小君皆諱同姓也何則書至必曰夫人某氏至自某孟子則不可言姬氏至自吳也書薨必曰夫人某氏薨孟子則不可曰夫人姬氏薨也書葬必曰葬我小君某氏孟子則不可曰小君姬氏也言婦人之字必配之姓孟子不可諡曰昭姬此所以但書曰孟子耳然雖為君隱其實亦不可揜矣

公會吳子于橐

章夜反
一音託 臯

橐臯在淮南逡道縣東南今廬州慎縣左氏傳公會吳

于橐皋吳子使大宰嚭請尋盟尋節盟公不欲使子貢對曰盟所以周信也故心以制之玉帛以奉之言以結之明神以要之寡君以為苟有盟焉弗可改也已若猶可改日盟何益今吾子曰必尋盟尋而溫之也若可尋也亦可寒也乃不尋盟往年會鄒今又會橐皋經據事而書譏公復與夷會也

秋公會衛侯宋皇瑗于鄆

鄆在海陵今泰州城下左氏傳吳徵會于衛秋衛侯會

吳于鄆公及衛侯宋皇瑗盟而卒辭吳盟吳以衛先時殺吳行人欲執之以子貢言乃舍衛侯趙氏曰案上文

公自會吳于橐皋不言宋衛同會若實同會即當書之又若四國同會如何三國盟而獨辭吳乎吳力猶能囚衛侯三國敢拒之乎故知此傳謬甚矣經文衛不與吳會即子木子貢之言並無所施矣

宋向巢帥師伐鄭

左氏傳宋鄭之間有隙地焉曰彌作頃邱玉暢品戈錫凡六邑子產與宋

人為成曰勿有是約二國俱棄之定十五年宋公子地奔鄭鄭人為之伐宋欲取地以處之及宋平元之族自蕭奔鄭鄭人為之城邑戈錫九月宋向巢伐鄭取錫殺元公之孫遂圍邑十二月鄭罕達救邑圍宋師冬十有二月螽冬溫而螽生書以紀異也

十有三年

已未

春鄭罕達帥師取宋師于邑

宋向巢帥師伐鄭圍邑鄭

罕達救邑帥師圍之腹背受敵無所逃焉惟我所得而已故曰取宋師報雍邱之役也二國取師以相償報其惡如此

夏許男成卒

公會晉侯及吳子于黃池

陳留封邱縣有黃亭近濟水地譜東京開封縣有黃池

左氏傳夏公會單平公周卿士不書尊之也不與會晉
定公吳夫差于黃池黃池之會吳晉爭長左氏以為
先晉非也國語以為先吳外傳又謂吳以甲三萬脅晉
而先之是也蓋是時晉霸已衰不主諸侯者二十四年
宋之會襄二十七年楚已先晉矣陵遲至此夫差擅強
氣吞區宇中國愈不能抗故此會宜乎吳主之也書公
會晉侯及吳子者言及者吳主會而晉侯及之也諸夏
衰而同于吳也然不曰會吳子者吳終不可主乎中國
也此上屢書吳但舉號此進之子何耶晉諷吳僭王宜
曰吳公吳從之以其知過故進之以爵亦所以見中國
之衰書晉在上而及吳子所以抑吳人之橫也抑狂僭
存中夏聖人之意微矣公羊謂及吳子何會兩伯之辭
也不與吳入之主中國則曷為以會兩伯之辭言之重
吳也曷為重吳吳在是則天下諸侯莫敢不至也想斯
時大小諸侯畢至惟宋不至故吳會後伐之然止書魯
晉會者聖筆削之也削之者不與吳人之主中夏也自

此世愈降而愈下其亂極矣宜乎明年聖筆絕於獲麟也其時吳方強恣先會諸侯不知越已乘虛而入吳矣吳子歸及越平終子胥三年吳始弱矣之語

楚公子申帥師伐陳

陳即吳故楚屢伐之今以越入吳吳亂不救故又伐之

於越入吳

左氏傳六月丙子越子伐吳為二隧道也疇無餘謳陽越二大夫自南方先及郊吳太子

友王子地王孫彌庸壽於姚自泓上觀之彌庸見姑蔑

之旗姑蔑越地曰吾父之旗也彌庸父為越所獲故姑

蔑人得其旌旗不可以見讎而弗殺也太子曰戰而不

克將亡國請待之彌庸不可屬徒五千王于地助之乙

酉戰彌庸獲疇無餘地獲謳陽越子至王于地守丙戌

復戰大敗吳師獲太子友王孫彌庸壽於姚丁亥入吳

吳人告敗于王王惡其聞也惡諸侯聞之自劉七人於

幕下以絕口吳子方會諸侯于中州越乘其無備而入

胡氏曰吳自柏舉以來憑陵中國黃池之會遂主夏盟可謂強矣而春秋繼書於越入吳所謂因事屬辭垂戒後世見深切著明之義也

秋公至自會

晉魏曼多帥師侵衛

許氏曰晉以范中行難伐衛伐鮮虞

閒齊之難而一侵之又再侵衛而諸侯卒莫之宗者惟其國無政也師雖數出能侵而已益玩而頓矣此王霸道盡之時也

葬許元公

九月螽

冬十有一月有星孛于東方

孛彗星也光芒四出曰孛不言所次見于旦也旦則

衆星皆沒而孛乃見故不言所在之次除舊布新之妖其兆於東方乎

盜殺陳夏區

音夫

十有二月螽

呂氏曰此年九月螽十二月螽陰陽錯亂之甚當世君臣亦可

以自省許氏曰自用田賦而比年三書螽貪殘無已之應也春秋書魯人事至用田賦書魯天災至於二年三螽則見其民力已窮天命已去君子之心於魯已矣故春秋以大歛之顛終也

十有四年

庚申

春西狩獲麟

杜氏注大野在魯西故言西狩左氏傳西狩于大野大野

在高平鉅野縣東北大澤是也叔孫氏之車子鉏商獲

麟車子微者鉏商名以為不祥以賜虞人時所未嘗見

故怪之虞人掌山澤之官


仲尼觀之曰麟也然後取之

言魯史所以得書獲麟

詩釋文麟麇身牛尾馬足一

角角端有肉毛蟲之長不踐生草不履生蟲音中律呂行中規矩王者至仁則出杜氏曰子曰鳳鳥不至河

不出圖吾已矣夫蓋傷時王之政也麟鳳五靈王者之嘉瑞也今麟出非其時虛其應而失其歸此聖人所以為感也絕筆於獲麟之一句者所感而起固所以終也麟仁獸也出非其時不幸以狩獲而罹害夫子烏得不感歎而傷之乎故春秋于是終焉嗚呼春秋之季亂至極矣禮義泯絕綱紀紊亂中國益微強暴益橫淪而周歟除舊布新之妖其兆於東乎王者之嘉瑞其獲於西乎於是乎絕筆



讀春秋編卷十二